

古

微

書

四







古 微 書
(四)

孫 穀 編

叢書集成初編

(補印本)

古 微 書

四 冊

一九三九年三月初版

一九五九年十月補印

孫 毅 編

商務印書館出版

上海虹口印刷廠印刷

古微書卷二十八

孝經援神契

伏羲大目山準日角而連珠衡

宋均云伏羲木精之人日角額有骨表取象日所出房所

立有星也珠衡衡中有骨表如連珠象玉衡星○類聚十七御覽七十八

神農長八尺有七寸宏身而牛頭龍顏而大脣懷成鈴戴玉

理○廣博物志

黃帝身逾九尺附函挺朶修髯花瘤河目龍頰日角龍顏廣

博物志

堯火精鳥庭荷勝八眉

注云庭有鳥骨表取象朱鳥與太微庭也朱鳥戴聖荷勝似之○御覽八

十

舜龍顏重瞳大口

注重瞳象電多精光大口象斗星口也

手握袞

注握袞者手中有袞字也

喻從勞苦起受衰飾致大祚也。初學記
九類聚十一御覽八十一又三百七十

禹虎鼻御覽三
百六十七

孔子海口言若含澤御覽三
百六十七

按內經靈樞五閱五使篇曰五官不辨闕庭不張小其明
堂藩蔽不見又卑其牆牆下無基垂角去外如是者雖平
常殆其解在五色篇曰明堂者鼻也闕者眉閒也庭者顏
也藩者頰側也蔽者耳門也其閒欲方大去之十步皆見
於外如是者壽必中百歲 通於此者可以思相術之源
矣

伏羲樂名扶來亦曰立本神農樂名曰扶持亦曰下謀少昊
樂名曰九淵通考百二十
八引孝經緯又伏羲之樂曰立基神農之樂

曰下謀祝融之樂曰屬續○周禮大司樂疏

按辨樂論云昔伏羲氏因時興利教民畋漁天下歸之時則有網罟之歌神農繼之教民食穀時則有豐年之詠按扶來歌卽鳳來之頌乃神農之扶犁也扶鳳來犁音相同稱是知神農因大昊之樂又呂覽祝融氏聽弇州之鳥鳴以爲樂歌作樂屬俗以通倫類諧神明而和人聲則知效鳳音者不始于黃帝

神農耕桑得利究年受福○路史炎帝紀注

禹鑿龍門闢伊闕決江開岷導四瀆○御覽四十一

賁居子曰神農播穀大禹治水皇帝王之中勳業最殊故特著之

倉頡文字者

○路史史皇紀注
倉頡下有作字

總而爲言包意以名事也分

而爲義則文者祖父字者子孫得之自然備其文理象形之屬則謂之文因而滋蔓子母相生形聲會意之屬則謂之字字者言孳乳浸多也題之竹帛謂之書書者如也舒也著也

記也

○御覽七百四十九

按倉頡沮誦共造文字今但知有倉頡不知沮誦又三墳伏羲氏始畫八卦命臣飛龍氏造六書則不始於倉頡矣淮南子乃云倉頡作字而天雨粟鬼夜哭伯益作井而龍登元雲神棲崑崙何說之誕乎皇覽曰史皇歿葬利鄉亭學書者皆往投刺祀之不絕若是乎明德之遠也又按許慎說文倉頡之初作書蓋依類象形謂之文其後

形聲相益謂之字文者物象之本字者孳乳而生通志略曰小學之義第一當識字母之相生第二當識文字之有閒象形指事文也會意諧聲轉注字也假借文字俱也六書也者象形爲本形不可象則屬諸事事不可指則屬諸意意不可會則屬諸聲聲則無不諧矣五者不足而後假借生焉假借窮而後轉注附焉 及闕法苑珠林造書凡有三人長名曰梵其書右行次曰佉盧其書左行少者蒼頡其書下行又陶隱居真誥曰今請陳爲書之本始也造文文旣肇矣乃是五色初萌文章畫定之時秀人民之交別陰陽之分則有三元八會羣方飛天之書又有八龍雲篆明光之章也其後逮三皇之世演八會之文爲龍鳳之

章拘省雲篆之迹以為順行梵書分破二道壞真從易配別本支乃為六十四種之書也遂播之於三十六天十方上下也

賁居子曰此各爭一蒼頡之名耳然後知文字一道古今為忌非獨人忌之鬼亦忌之仙亦忌之其究也天帝亦忌之無已掃空文字歸於面壁

廟者所以尊祖也

說見禮緯○書鈔八十七御覽五百三十一

郊祀后稷以配天配靈威仰也宗祀文王於明堂配上帝凡

祀配上帝也

○禮大傳注引孝經末句作汎配五帝也此鄭氏語與經文相闕非緯文

祭祀之

禮與祭天同

注衣服同也○禮王制疏祭祀作祭地

按杜氏通典王者先祖皆感太微五帝之精以生其神名

蒼則靈威仰赤則赤熛怒黃則含樞紐白則白招拒黑則
協光紀皆用正歲之正月郊祭之所謂王者禘其祖之所
自出以其祖配之也其配祭以五人帝春以太皞夏以炎
帝季夏以黃帝秋以少昊冬以顓頊月令云其帝太皞等
是也

明堂者天子布政之宮八牕四闔上圓下方在國之陽

○初學記

十三類聚帝者諦也象上可承五精之神五精之神實在太

微於辰爲巳

○禮玉藻疏明堂位疏

明堂文王之廟夏后氏世室殷人重屋周人明堂東西九筵
筵九尺南北七筵堂崇一筵五室凡室二筵蓋之以茅周公
所以祀文王於明堂以昭事上帝

○此五經異義引古周禮孝經說非緯書本文

明堂之制東西九筵二丈九尺也明堂東西八十一尺南北六十三尺故謂之太室又周之明堂在國之陽三里之外七里之內在辰巳者也○並御覽五百三十三得陽氣明朗謂之明堂考

工記匠人疏

按杜氏通典黃帝拜祀上帝於明堂其堂之制中有一殿四面無壁以茅蓋通水水圍宮垣為復道上有樓從西南入名崑崙天子從之入以拜祀唐虞祀五帝於五府夏氏享祖宗於世室世室之制堂修二七廣修四之一五室三四步四三尺九階四旁兩夾牕白盛門堂三之二室三之一般人曰重屋其制堂修七尋崇三尺四阿重屋周制季秋大享宗祀文王也

又按大戴禮明堂凡九室一室而有四戶八牖三十六戶七十二牖以茅蓋屋上圓下方

又明堂月令赤綴戶也白綴牖也二九四七五三六一八堂高三尺東西九筵南北七筵上圓下方九室十二堂堂四戶戶二牖其宮方三百步在近郊近郊三十里其說云堂方百四十四尺坤之策也屋圍徑二百一十六尺乾之策也太廟明堂方三十六丈通天屋徑五丈陰陽九六之變且圓蓋方載六九之道八闔以象八卦九室以象九州十二宮以應十二辰三十六戶七十二牖以四戶八牖乘九室之數也戶皆外設而不閉示天下不藏也通天屋高八十一尺黃鍾九九之實也二十八社列於四方亦七宿

之象也堂高三尺以應三統四嚮五色各象其形外博二十四丈以應節氣也又蔡邕明堂章句曰明堂者天子太廟所以宗祀周謂之明堂東曰青陽南曰明堂西曰總章北曰元堂中曰太室人君南面故主以明堂爲名在其五堂之中央皆曰太廟饗射養老教學選士皆于其中故言其正室之貌則曰太廟取其尊崇則曰太室取其四時之學則曰太學取其周水圍如璧則曰辟雍雖各異名其實一也

靈臺考符居高顯神聖王所以宣德察微

○御覽五百三十四

按服氏注云人君入太廟視朔天子曰靈臺諸侯曰觀臺在明堂之中

社土地之主稷五穀之長俱土神而所主之功異所主既異

故其所配亦異

○路史炎帝紀注

土地廣博不可徧敬故封土以為

社而祀之以報功也五穀衆多不可徧祭稷乃原隰之中能

長五穀之祗故立稷而祭之

○通典四十五注初學記十三類聚三十九御覽三十五又五百

三十二引孝經緯並小異報社祭稷以三牲何重功故也

○書鈔八十七

按通典顓頊祀共工氏子句龍為社烈山氏子柱為稷高

辛氏唐虞夏皆因之殷湯為旱遷柱而以周棄代之欲遷

句龍無可繼者故止周制天子立三社祭法云王為羣姓

立社曰太社於庫門內之西立之王自為立社曰王社于

籍田立之亡國之社曰亳社廟門之外立之立名雖異其

神則同皆以句龍配之稷周棄配之

郊祀后稷以配天地祭天南郊就陽位祭地北郊就陰位后

稷為天地主文王為五帝宗○通典四十五注以為鉤命決文

燔燎掃地祭牲繭栗或象天酒旗坐星廚倉具黍稷布席極

敬心也○周禮以神仕者注續漢書祭祀志注

封於泰山考績燔燎禋於梁父刻石紀號垂度示典功平致

教○文選王元長曲水詩序注書鈔九十一並以為鉤命決文

天子臨辟雍親割牲以養三老○書鈔八十三以為鉤命決文尊三老者

父象也謁者奉几安車輶輪供綬執授兄事五更寵以度接

禮交容謙恭順貌宋均曰三老老人知天地人事者奉几授綬三老就車天子親執綬授之五更老人知五行更代王於

事也度法也度以寵異其人也○續漢書禮儀志注王於

養老燕之末命諸侯○此十字孫氏以意增諸侯歸各帥於國大夫勤

於朝州里驥於邑驥音冀。禮文王世子注疏。

按白虎通辟者璧也象璧圓又以法天於雍水側象教化

流行也辟之為言積也積天下之道德也雍之為言壅也

壅天下之殘賊故謂之辟雍也

祿者錄也取上所以收錄於下下所以謹錄事上詩穆木疏爾雅釋

言疏母之於子也鞠養殷勤推燥居濕絕少分甘宋均注曰少則自絕甘則

分。後漢書楊震傳注御覽四百三十二

喪不過三年以期增倍五五二十五月義斷仁期十二月也再期二十五

月也言期增倍則可矣復云二十五月者容有閏故曰期而復云二十五月也春秋曰閏月葬齊景公喪數閏也示

民有終喪絕情再期萬物再終喪者彌遠追慕殺故因殺以絕之。御覽五百四十五

三諫待放復三年盡惓惓也所以言放者臣為君諱若言有

過而放矣所諫事已行者遂去不留凡待放者冀君用其言
耳事已行災咎將至無爲留之臣待放于郊君不絕其祿者
示不欲去道不合故去耳以其祿三分之二與之一留與其
妻長子使得祭其宗廟賜之環卽還賜玦則去

百五十六

○白虎通諫
諍篇御覽四

按白虎通人懷五常故有五諫謂諷諫順諫窺諫指諫直
諫諷諫者智也知禍患之萌深睹其事未彰而諷告焉此
智之性也順諫者仁也出辭遜順不逆君心仁之性也窺
諫者禮也視君顏色不悅且卻悅則復前以禮進退此禮
之性也指諫者信也指者質也質指其事而諫也此信之
性也直諫者義也惻隱發於中直言國之害勵志忘生爲

君不避喪身義之性也孔子曰諫有五吾從諷之諫

王德稱文備象連表萬精曲飾題類設術修經窮仁尚義祖

禮行信握權任智順道行仁俱在至德

御覽七十六

天子刑于四海德洞淪冥八方神化則斗實精

御覽八十七十二

按顧野王瑞應圖王者行孝之溢則斗實精北斗七星光

明若將實也

王者德及于天則日抱戴

在上曰戴在旁曰抱

斗極明日月光天降甘

露

禮禮運疏爾雅釋天疏御覽三又八百七十二

又黃氣抱日輔臣納忠

御覽三又八

百七十二

按瑞應圖君賢得土地則日有黃抱揚光者人君不假臣

之權則日揚光

又日

王者動不失日揚光

德至于地則華萃感嘉禾生蓂莢出秬鬯滋

禮禮運疏文選華林園集詩

注御覽八百二十九又八百七十三

瑞應圖華萃其枝正平王者有德則生德剛則仰德弱則

低蓂莢者葉圓而五色一名歷莢十五葉日生一葉從朔

至望畢從十六日毀一葉至晦而盡月小則一葉卷而不

落聖明之瑞也人君德合乾坤則生秬鬯者三隅之黍一

稔二米王者宗廟修則生又昭穆序祭祀宰人咸有敬讓

禮容之節威儀之美則秬鬯生又王者節敬依禮度親疎

有別則秬鬯生黃帝時南夷乘白鹿來獻秬鬯

德至八方則祥風至

類聚一御覽九又八百七十二

德至山陵則景雲見

澤出神馬山出根車泉出黑丹

禮禮運疏御覽七百七十二又八百九

十三又九
百八十五

按宋志飛菟者神馬之名也日行三萬里禹治水勤勞歷
年救民之害天應其德而至腰裏與飛菟同騰黃狀如狐
背上有兩角出白民之國乘之壽三千歲黃帝乘之瑞應
圖曰乘黃王者輿服有度則出龍馬者神馬也河水之精
高八尺五寸長頭鬣上有翼旁垂毛鳴聲九首有明王則
見黑丹石墨也丹者別是彩名亦猶青黃白皆曰丹也宋
志王者修至孝則出

木根車應載萬物金車王者志行德則出虞舜德盛於山陵
故山車出山者自然之物也山藏之精與象車相似舜時德
盛山車有垂綬

○御覽七
百七十三

按宋志象車者山之精也王者德澤流洽四境則出山車者山藏之精也不藏金玉山澤以時通山海之饒以給天

下則山成其車金車王者至孝則出

德至深泉則黃龍見醴泉湧澤阜出萑蒲○御覽八百七十三引此句在德至

山陵之下河出圖洛出書江生大貝○禮禮運疏爾雅釋天疏御覽八百七十三又九百四十一

黃龍見者君之象也○類聚九十八德至淵則海出明珠○御覽八百二十一

按瑞應圖黃龍者神之精四靈之長也王者不漉池捕魚

德達深淵則應氣而游池沼萑蒲者樹名也其葉大如門

扇不搖自動一名倚扇狀如蓬枝多葉少根如絲轉而風

生主于飲食清涼驅殺蟲蠅堯時冬死夏生舜時生於廚

右階左大貝王者不貪財寶則出

德至鳥獸則鳳皇翔鸞鳥舞麒麟白虎見白鹿來狐九尾

白鳥下雉白首妃房不偏故白雉應○哀十四年公羊傳注禮禮運疏類聚九十九

按宋志白鳥王者宗廟肅敬則至

王者奉已約儉塙樹不役臺榭不侈尊事耆老則白雀見類聚九十九御覽九百二十二

九百二十二

宋志白雀王者爵祿均則至

德至草木則朱草生木連理芝草繁○禮禮運疏類聚九十八御覽八百七十三

瑞應圖朱草草之精也王者德無所不通四方有歌咏之

聲則生

天子至德屬於四海則延嘉生○御覽八百七十三

宋志作延嬉王者孝道行則至

神靈滋液百寶為用則璣鏡出

注云大鏡也

珠母見

珠母璣鏡也事神明得則

大珠有光可為鏡

白象至翠羽耀有景星

初學記二十五又二十七御覽八百二又八百七

十二又九百二十四

按瑞應圖王者自養有道則白象負不死之藥來

神靈滋液有銀囊不汲自隨不盛自滿

御覽七百五十八又八百十二

瑞應圖王者宴不及醉刑罰中人不為非則銀囊出

珊瑚鉤瑞寶也神靈滋液百珍寶用則見

御覽八百七神明滋液

則玳瑁背也

背文也

則琉璃鏡則琅玕景則碧玉出

御覽八百八又八百九

周成王時越裳獻白雉去京師三萬里王者祭祀不相踰宴

食衣服有節則至

類聚九十九御覽九百十七

按瑞應圖珊瑚鉤王者恭信則見一本云不珍玩弄則出

古微書卷二十八終

古微書

卷二十八

古微書卷二十九

孝經援神契

易建八卦序六十四卦轉成三百八十四爻運機布度其氣

轉易故稱經也

○易疏序引孝經緯

易長於變書考命符授河

宋注曰授河者授河洛以考命符也。○初學記二十一御覽六百九

按玉海伏羲始畫八卦是謂先天有圖象而未有書夏曰

連山天易也商曰歸藏地易也有法數而未有書文王曰

周易人易也始有書矣又夏殷以不變為占周易以變為

占連山八萬言歸藏四千三百言連山用三十六策歸藏

用四十五策周易用四十九策又易傳孔子云易有四易

一世二世為地易三世四世為人易五世六世為天易游

魂歸魂爲鬼易

乾坤鑿度云仲尼魯人生不知易本偶筮其命得旅請益於商瞿氏曰子有聖智而無位孔子泣而曰天也命也鳳鳥不來河無圖至嗚呼天命之也歎息而後息志停讀禮止也住史削作不五十究易作十翼明也明易幾教若曰終日而作思之千古聖頤師於姬昌法且作九問十惡七正八歎上下繫辭大道大數大法大義易書中爲通聖之問明者以爲聖賢矣

又按路史昔楚倚相能讀三墳五典八索九邱之書及孔子求古之史記自二典九邱之外三墳八索已不得而見矣後世不知其何書也孔安國以爲義炎黃帝之書曰三

墳少昊顓鬻唐虞之書曰五典康成從之而賈逵亦以三墳爲三皇時書五典爲五帝常典至馬季長始以三墳爲陰陽始生天地人之三氣五典爲五行之說籍外論之豈其然哉

又隋書云孔子觀書周室得虞夏商周四代之典刪其善者爲百篇遭秦滅學至漢唯濟南伏生口傳二十八篇又河內女子得秦誓一篇獻之伏生作尙書傳四十一篇

春秋三世以九九八十一爲限隱元年盡僖十八年爲一世自僖十九年盡襄十二年又爲一世自襄十三年盡哀十四年又爲一世所以不悉八十一年者見人命參差不可以齊之義

○公羊傳序疏

按公羊注疏解云孔子至聖却觀無窮知秦無道將必燔書故春秋之說口授子貢度秦至漢乃著竹帛問曰春秋說云春秋設三科九旨其義如何答曰何氏作文諡例云三科九旨者新周故宋以春秋當新王此一科三旨也又云所見異辭所聞異辭所傳聞異辭二科六旨也又內其國而外諸夏內諸夏而外夷狄是三科九旨也按宋氏之註春秋說三科者一曰張三世二曰存三統三曰異外內是三科也九旨者一曰時二曰月三曰日四曰王五曰天王六曰天子七曰譏八曰貶九曰絕時與日月詳略之旨也王與天王天子是錄遠近親疎之旨也譏與貶絕則輕重之旨也又文諡例云此春秋五始三科九旨七等六輔

二類之義以矯枉撥亂爲受命品道之端正德之紀也五
始者元年春王正月公卽位是也七等者州國氏人名字
子是也六輔者公輔天子卿輔公大夫輔卿士輔大夫京
師輔君諸夏輔京師是也二類者人事與災異是也春秋
說云春秋書有七缺八缺之義如何答曰七缺者惠公妃
匹不正隱桓之禍生是爲夫之道缺也文姜淫而害夫爲
婦之道缺也大夫無罪而致戮爲君之道缺也臣而害上
爲臣之道缺也僖五年晉侯殺其世子申生襄二十六年
宋公殺其世子痤殘虐枉殺其子是爲父之道缺也文二
年楚世子商臣弑其君髡襄三十年蔡世子般弑其君胡
是爲子之道缺也桓八年正月己卯烝桓十四年八月乙

亥嘗僖三十一年夏四月四卜郊不從乃免牲猶三望郊祀不修周公之禮缺是爲七缺也矣

嚴氏春秋引觀周篇云孔子將修春秋與左邱明乘如周觀書於周史 閔因敘昔孔子受端門之命而制春秋之義使子夏等十四人求周史記得百二十國寶書

孔子作春秋制孝經既成使七十二弟子向北辰星罄折而立使曾子抱河洛事北向孔子齋戒簪纓筆衣絳單衣向北辰而拜

書鈔八十五御覽五百四十二

告備于天曰孝經四卷春秋河洛

凡八十一卷謹已備天乃虹鬱起白霧摩地赤虹自上下化

爲黃玉長三尺上有刻文孔子跪受而讀之曰寶文出劉季

握卯金刀在軫北字禾子天下服

語見宋書符瑞志

賁居子曰孝經與周易皆聖人神力護持竟有以之治病以之祛邪者

按齊史顧歡好黃老通解陰陽數術人有病邪者問歡歡曰家有何書答曰惟有孝經而已歡曰可取仲尼居置病人枕邊恭敬之自差也而後病者果愈人問其故答曰善禳惡正勝邪此病者所以差也又三國典略徐陵子份有孝行陵嘗遇病甚篤份燒香泣涕跪誦孝經晝夜不息如此者三陵病忽然而愈南史皇侃性至孝嘗日限誦孝經二十遍以比觀世音經良有以也

魯哀公十四年孔子夜夢三槐之間豐沛之邦有赤烟氣起乃呼顏淵子夏往視之驅車到楚西北范氏街見芻兒摘麟

傷其左前足薪而覆之孔子曰兒來汝姓為誰兒曰吾姓為
 赤誦名子喬字受紀孔子曰汝豈有所見耶兒曰見一禽巨
 如羔羊頭上有角其末有肉孔子曰天下已有主也為赤劉
 陳項為輔五星入井從歲星兒發薪下麟示孔子孔子趨而
 往麟蒙其耳吐三卷圖廣三寸長八寸每卷二十四字其言
 赤劉當起曰周亡赤氣起火耀興元邱制命帝卯金

○語見宋書符

瑞志又隸釋史晨碑引末七字以為援神契文與孫氏合

麟中央也軒轅大角獸也孔子備春秋者修禮以致其子故

麟來為孔子瑞

○此五經異義引左氏說非緯書本文

按服虔說云麟中央土獸土為信信禮之子修其母致其
 子視明禮修而麟至思睿信立而白虎馴言從義成而神

龜在沼聽聰知正則名川出龍貌恭性仁則鳳凰來儀

命有三科有受命以保慶有遭命以謫暴有隨命以督行

受命

謂年壽也遭命謂行善而遇凶也隨命謂隨其善惡而報之禮祭法疏

按宋王及甫天經書朱文公謂類集古今言命極為該備

以十二星辰歷推人命貴賤始於唐貞元初都利術士李

彌乾

韋斯經本梵書

程子謂三命是律五星是歷晁氏謂汭州鳩

曰武王伐商歲在鶉火月在天駟日在析木之津辰在斗

柄星在天龜五星之術其來尚矣

又

世之相傳有黃帝風

后三命一家而河上公實能言之沿及後世臨孝恭有祿

命書陶宏景有三命抄略唐人習者頗衆而張一行桑道

茂李虛中咸精其書虛中之後唯徐子平尤造其闔奧也

然以甲子榦枝推人所生歲月展轉相配其數極於七百二十以七百二十之日時其數終於五十一萬八千四百夫以天下之廣兆民之衆林林而生者不可以數計日有十二時未必一時唯生一人也以此觀之同時生者不少何其吉凶之不相同哉唐呂才敘祿命以爲今亦有同年同祿而貴賤懸殊共命共胎而壽夭更異按魯莊公法應貧賤又廷弱短陋惟得長壽秦始皇法無官爵縱得祿少奴婢爲人無始有終漢武帝後魏孝文帝皆法無官爵宋武帝祿與命並當空亡唯宜長子雖有次子法當早夭此皆祿命不驗之著明者也誠足以破其舛戾矣

聖王吹律有姓

○御覽
十六

按禮記疏云天子賜姓賜氏諸侯但賜氏不得賜姓降於天子也左傳曰天子建德因生以賜姓胙之土而命之氏諸侯以字爲諡因以爲族官有世功則有官族邑亦如之以此言之天子因諸侯先祖所生賜之曰姓杜預云若舜生媯汭賜姓曰媯封舜之後於陳以所封之土命爲氏舜後姓媯而氏曰陳故鄭駁異義云炎帝姓姜太皞之所賜也黃帝姓姬炎帝之所賜也故堯賜伯夷姓曰姜賜禹姓曰姒賜契姓曰子賜稷姓曰姬著在書傳諸侯賜卿大夫以氏者若同姓公之子曰公子公子之子曰公孫公孫之子其親已遠不得上連于公故以王父氏爲氏若適夫人之子則以五十字伯仲爲氏若魯之仲孫季孫是也若庶

子妾子則以二十字爲氏則展氏臧氏是也若異姓則以父祖官及所食之邑爲氏以官爲氏者則司馬司城是也以邑爲氏者若韓趙魏是也凡賜氏族者此爲卿乃賜有大功德者主賜以族若叔孫得臣是也雖公子之身若有大功德則以公子之字賜以爲族若仲遂是也其無功德死後乃賜族若無駭是也若子孫爲卿其君不賜族子孫自以王父字爲族也氏族對文爲別散則通也

土黃白宜種禾黑墳宜黍麥土蒼赤宜菽白宜稻污泉宜稻

○御覽八百二十三又八百三十八又八百三十九又八百四十一

按管子地員篇九州之土爲九十物每州有常而物有次羣土之長是唯五粟五粟之狀淖而不朘剛而不殼不滯

車輪不汚手足其種大重細重白莖白秀無不宜也五粟
之土若在陵在山在墳在衍其陰其陽盡宜桐柞莫不秀
長其榆其柳其檉其桑其柘其櫟其槐其楊羣木蕃滋數
大條直以長其澤則多魚牧則宜牛羊其地其樊俱宜竹
箭藻龜檣檀五臭生之薜荔白芷麋蕪椒連五臭所校寡
疾難老士女皆好其民工巧其泉黃白其人夷姤五粟之
土乾而不格湛而不澤無高下葆澤以處是謂粟土粟土
之次曰五沃沃土之次曰五位位土之次曰五蔭蔭土之
次曰五壤壤土之次曰五浮凡上土三十物種十二物中
土曰五恣五恣之狀廩焉如盪潤濕以處其種大稷細稷
舛莖黃秀慈忍水旱細粟如麻菁殖果木不若三土以十

分之三悲土之次曰五纏纏土之次曰五監監土之次曰五剽剽土之次曰五沙沙土之次曰五塌凡中土三十物種十二物下土曰五猶五猶之狀如糞其種大華細華白莖黑秀蓄殖果木不如三土以十分之五猶土之次曰五壯五壯之次曰五殖五殖之次曰五穀五穀之次曰五鼻鼻土之次曰五桀凡下土三十物其種十二物凡土物九十其種三十六 此古人物土之術也惜不傳於後世矣為存其略

石潤苞玉丹精生金椒薑禦温

○抱朴子引作濕

葛蒲益聰巨勝延

年威喜辟兵

○抱朴子仙藥篇類聚八十三又八十九

按抱朴子仙藥之上者丹砂次則黃金次則白金次則諸

芝次則五玉次則雲母次則明珠次則太乙禹餘糧次則石中黃子次則石桂次則石英次則石腦次則石流丹次則石粉次則曾青次則松柏脂茯苓地黃麥門冬木巨勝重樓黃連石掌子石家紫一名托盧是也或名仙人杖或名西王母杖或名天精或名却老或名地骨或名枸杞也又雷公炮炙論序云若夫世人使藥豈知自有君臣既辨君臣寧分相制祇如枕毛霑溺立銷斑腫之毒象膽揮黏乃知藥有情異鮭魚插樹立便乾枯用狗膽塗卽當榮盛無名止楚截指而似去甲毛聖石開盲明目而如雲離日當歸止血破血頭尾效各不同麩子熟生足睡不眠立據弊筭淡鹵如酒霑交鐵遇神砂如泥似粉石經鶴糞化作

塵飛杙見橘花似髓斷絃折劍遇鸞血而如初海竭江枯
投游波而立泛令鈇拒火須仗修天如要形堅豈忘紫背
留砒住鼎全賴宗心雌得芹花立便成庾礪遇赤鬚水留
金鼎水中生火非猾髓而莫能長齒生牙賴雄鼠之骨末
髮眉墮落塗半夏而立生目辟眼矐有五花而自正脚生
肉杙裊繫蓉根囊皺旋多夜煎竹木體寒腹大全賴顧鸕
血泛經過飲調瓜子效逆數數酒服熟雄徧體癭風冷調
生側腸虛泄痢須假草零久渴心煩宜投竹瀝除癥去塊
合仗硝礪益食加觴須煎蘆朴強筋健骨酒是菘鱓駐色
延年精蒸神錦知瘡所在口點陰膠產後肌浮甘皮酒服
口瘡舌垢立愈黃蘇腦痛欲亡鼻投硝末心痛欲死速覓

延胡如斯百種是藥之功 此文亦古而麗者矣錄之以

志百物皆藥指顧可辨

象鼻必卷鳥喙必鉤龜水伏故去脈蝟多刺故不起超踰楊

柳蟬無力故不食蝙蝠伏匿故夜食蠖無食故不勞無螫故

無心蟹二螯兩端旁行螯猶兵也小蟲而欲蜂蠶垂芒凡蠶

後故言垂芒○禮深衣疏御覽九百三又九百十二又九百

四十二又九百四十四又九百四十六又九百四十七又九

百五戴絰下蠶始生○御覽九百二十三獸螫伏獺祭魚則十月終也○詩

魚麗疏禮王制疏

按子列子適衛食於道從者見百歲髑髏撻蓬而指顧謂
弟子百豐曰唯子與彼知而未嘗生未嘗死也此過養乎

過歡乎種有幾若蠹爲鶉得水爲鼈得水土之際則爲蠹
蟻之衣生于陵屯則爲陵舄得鬱棲則爲烏足烏足之根
爲齧螬其葉爲胡蝶胡蝶胥也化而爲蟲生竈下其狀若
脫其名曰駒掇駒掇千日化而爲鳥其名曰乾餘骨乾餘
骨之沫爲斯彌斯彌爲食醯頤輅食醯頤輅生乎食醯黃
輒食醯黃輒生乎九猷九猷生乎薈芮薈芮生乎腐蠶羊
肝化爲地臯馬血之爲轉燐也人血之爲野火也鷓之爲
鷓鷓之爲布穀布穀久復爲鷓也燕之爲蛤也田鼠之爲
鶉也朽瓜之爲魚也老韭之爲莧也老踰之爲猿也魚卵
之爲蟲豈爰之獸自孕而生曰類河澤之鳥視而生曰鷓
純雌其名大睪純雄其名穉蜂思士不妻而感思女不夫

而孕后稷生乎巨跡伊尹生乎空桑厥昭生乎濕醯雞生
乎酒羊奚比乎不苟久竹生青寧青寧生程程生馬馬生
人人久入於機萬物出於機皆入於機

古微書卷二十九終

古微書卷三十

孝經鉤命決

緯書以命言者莫如元苞以鉤言者莫如春秋之文耀
鉤河圖之稽耀鉤茲撰孝經緯則直言決矣殆即元命
耀鉤之命而參其奧以示人也故以決名

天子爵稱也三皇步五帝趨三王馳五霸○白虎通爵篇號篇又三

皇步五帝驟三王馳五伯蹶七雄僵○後漢書曹爽傳注書鈔五御覽七十六

按本注道隆德備日月為之步時事彌順日月為之驟勤

思不已日月乃馳

或稱帝王接上稱天子明以爵事天接下稱帝王明以號令

臣下○御覽七十六

道機合者稱皇

○文選西都賦注

又帝受命握符出

○文選安陸昭王碑注

說皆見前

孔子曰三皇設言民不違五帝畫象世順機三王肉刑接漸

加應世黠巧姦偽多

多音絃加音姬○襄二十九年公羊傳疏引孝經說

三皇無文五帝畫象三王肉刑

注曰畫象者上罪墨象赭衣雜屨中罪赭衣雜屨下罪雜

屨而已○周禮外史疏司圖疏

按大戴盛德篇凡人民疾六畜疫五穀災者生於天天道

不順生於明堂不飾故有天災則飾明堂也凡民之爲姦

邪竊盜歷法妄行者生於不足不足生於無度量也故有

姦邪竊盜歷法妄行之獄則飾度量也凡不孝生於不仁

愛也不仁愛生於喪祭之禮不明故有不孝之獄則飾喪

祭之禮凡弑上生於義不明故有弑獄則飾朝聘之禮也
凡鬪辨生於相侵陵也相侵陵生於長幼無序而教以敬
讓也故有鬪辨之獄則飾鄉飲酒之禮也凡淫亂生於男
女無別夫婦無義故有淫亂之獄則飾昏禮享聘也故曰
刑罰之所從生有源不務塞其源而務刑殺之是爲民設
陷以賊之也

又按尚書大傳曰決關梁踰城郭而略盜者其刑臙男女
不以義交者其刑宮觸易君命革輿服制度姦軌盜攘傷
人者其刑劓非事而事之出入不以道義而誦不詳之辭
者其刑墨降畔寇賊劫略奪攘矯虔者其刑死此五刑之
始也

唐堯五廟親廟四與始祖五禹四廟至子孫五殷五廟至子

孫六周六廟至子孫七○禮王制疏

說已見前

刑罰藏頌聲作鳳皇至麒麟應封泰山禪梁父○禮王制疏

說已見前

華胥履跡怪生皇犧跡靈威仰之跡也履任已感龍生帝魁

任已帝魁之母也魁附寶附寶帝軒母也出降大靈生帝軒軒黃帝名附

軒黃帝名附命星貫昴修已夢接生禹命使之星謂流星之

或作付也又七十九又八十二又百三十五

說已見前

舜即位巡省中河錄圖受文地在洛水傍方堯禪舜沈書曰

稷而赤光起舜禪禹沈璧堯壇赤光又起及湯觀洛沈璧三

投光不起矣

稷讀為側○路史有虞紀注

禹時五星累累如貫珠炳炳若連璧

○御覽七

說已見前

堯夢乘青龍上泰山舜夢擊鼓桀夢黑風破其宮紂夢大雷

擊其首

○白帖二十三以為夢書文

按東漢周宣夢書曰昔聖帝明王之時神氣炤然先見故

堯夢乘龍上泰山舜夢擊天鼓禹夢其手長湯夢布令天

下後皆有天下桀夢疾風壞其宮紂夢大雷擊其首齊桓

夢為大禽所中秦二世夢虎齧其馬王者夢之皆失天下

周禮太卜掌三夢之法一曰致夢二曰觥夢三曰咸陟其

經運十其別九十占夢掌以歲時占六夢之吉凶一曰正
夢二曰噩夢三曰思夢四曰寤夢五曰喜夢六曰懼夢
又靈樞經陰氣盛則夢涉大水而恐懼陽氣盛則夢大火
而燔炳陰陽俱盛則夢相殺上盛則夢飛下盛則夢墮甚
飢則夢取甚飽則夢予肝氣盛則夢怒肺氣盛則夢恐懼
哭泣飛揚心氣盛則夢善笑恐畏脾氣盛則夢歌樂身體
重不舉腎氣盛則夢腰脊兩解不屬凡此十二盛者至而
寫之立已厥氣客於心則夢見邱山烟火客於肺則夢飛
揚見金鐵之奇物客於肝則夢山林樹木客於脾則夢邱
陵大澤壞屋風雨客於腎則夢臨淵沒居水中客于膀胱
則夢游行客於胃則夢飲食客於大腸則夢田野客於小

腸則夢聚邑衝衝客於膽則夢鬪訟自刳客於陰器則夢
接內客於項則夢斬首客於脛則夢行走而不能前及居
深地窳苑中客於股肱則夢禮節拜起客於胞髓則夢洩
凡此十五不足者至而補之立已也及讀列子又有云凡
以浮虛爲疾者則夢揚以沈實爲疾者則夢溺藉帶而寢
則夢虵飛鳥銜髮則夢飛將陰夢火將疾夢食飲酒者憂
歌舞者哭與此稍別

性者生之質若木性則仁金性則義火性則禮水性則智土

性則信也

○禮王制疏引孝經說

情生於陰欲以時念也性生於陽以就理也陽氣者仁陰氣
者貪故情有利欲性有仁也

○白虎通情性篇

東夷之樂曰昧持矛助時生南夷之樂曰任持弓助時養西夷之樂曰朱離持鉞助時殺北夷之樂曰禁持楯助時藏皆於四門之外右辟○周禮鞮鞮氏疏

按禮記疏東方謂之夷者風俗通云東方人好生萬物觝觸地而出夷者觝也其類有九一曰元菟二曰樂浪三曰高麗四曰蒲飾五曰鳧夷六曰索家七曰東屠八曰倭人九曰天鄙南方曰蠻者風俗通云君臣同川而浴極爲簡慢蠻者慢也其類有八一曰天竺二曰咳首三曰焦僂四曰跂踵五曰穿胸六曰儋耳七曰狗軹八曰旁春西方曰戎者風俗通云斬伐殺生不得其中戎者兇也其類有六一曰僇夷二曰戎夷三曰老白四曰耆羌五曰鼻息六曰

天剛北方曰狄者風俗通云父子嫂叔同穴無別狄者辟也其行邪辟其類有五一曰月支二曰穢貊三曰匈奴四曰單于五曰白屋

賁居子曰凡夷狄而世雄長者類皆繫於神明之祚如槃弧之爲黃帝女也鬼方之爲陸終娶也勾吳祖周於越祖夏德鬻亦祖夏禹而後世匈奴劉姓者皆祖漢室李姓者皆祖李陵夫皆有其自焉五季以下公主降夷夷女適中國蠻夷與中夏今昔又不同矣崔盧李鄭平劉李張王乎此古人致謹于夷夏之防云其樂則難以悉考

天子臨辟雍親袒而割牲尊三老之象也謁者奉几安車輦

輪供綬執授○書鈔百四十一

按禮記疏人君養老有四種一是養三老五更二是子孫爲國難而死王養死者父祖三是養致仕之老四是引戶校年養庶人之老有虞氏以燕禮者崔氏云燕者殺烝於俎行一獻之禮坐而飲酒以至於醉夏后氏以饗禮者崔氏云饗則體薦而不食爵盈而不飲依尊卑而爲獻取數畢而已般人以食禮者崔氏云不飲酒饗太牢以禮食之般人質素威儀簡少故養老以食禮周人修而兼用之者備陰陽也凡飲養陽氣凡食養陰氣陽用春夏陰用秋冬又云三老以象三光五更以象五辰熊氏云天子視學之年養老一歲有七謂四時皆養也

仲尼牛脣舌理七重吐教陳機受度御覽三百六十八又仲

尼虎掌是謂威射御覽三百七十一胸應矩是謂儀古論語摘輔象

篇又仲尼龜脊御覽三百七十一又孔子海口言若含澤白帖又

夫子輔喉又夫子駢齒象鉤星也並御覽三百六十八

按伏無忌古今注云孔子生之夜有二蒼龍自天而下有

二神女擎香霧於空中以沐徵在先是五老列於庭前

則五星之精有麟吐玉書於闕里人家云水精之子繼商

周而素王出故蒼龍繞室五星降庭徵在知其為異乃以

繡紱繫麟角而去至敬王末魯哀公十四年魯人鉏商田

於大澤得麟以示夫子夫子知命之終乃抱麟解紱而出

涕泗焉

孫氏曰抄曰相之不可憑也南史庾萼傳萼孫夔家富於財食必列鼎又狀貌豐美頤頰開張人皆謂夔必爲方伯及魏克江陵夔以饑死時又有水軍都督褚雍面甚尖危從理入口竟保衣食而終唐柳渾十餘歲有巫告曰兒相天且賤出家可免死渾不從仕至宰相魏朱建平善相鍾繇以爲唐舉許負何以復加然相王肅年踰七十位至三公肅六十二終於中領軍南史徐陵八歲屬文十三通莊老光宅寺慧雲法師每嗟陵蚤死陵仕至太子少傅年七十七唐孔若思傳孔季詡擢制科授校書郎陳子昂嘗稱其神清韻遠可比衛玠而季詡終左補闕世之以骨相繩人抑何惑哉

孔子在庶德無所施功無所就志在春秋行在孝經○公羊傳序疏
又曰某以匹夫徒步以制正法以春秋屬商以孝經屬參○公

羊傳序疏又哀十四年公羊傳疏

孝經者篇題就號也所以表指括意序中書名出義見道曰

著就成也孝馬一篇之目十八章也一字苞十八章為天地

喉襟道要德本故擬以題符篇冠就會子撰斯問曰孝文乎

駁不同何撰撰經異同也子曰吾作孝經以素王無爵祿之賞斧鉞

之誅故稱明王之道曾子辟席復坐子曰居吾語汝順孫以

避災禍與先王以託權託先王以為已權勢也目至德要道以題行題

題夫子德行致羣首仲尼以立情性情性猶天地已不正為

瑞已行所及也之言子曰以開號若夫子所以自開於受命也列曾子示撰輔使若得錄之故行

冠子以立之也佐書詩以合謀二人同心其利斷金同心之與共治天下也矣書詩以合謀言其臭如蘭也○御覽六百

按隋書孔子既敘六經題目不同指意差別恐斯道離散故作孝經以總會之明其枝流雖分本萌于孝者也遭秦焚書爲河間人顏芝所藏漢初芝子貞出之凡十八章而長孫氏博士江翁少府后蒼諫議大夫翼奉安昌侯張禹皆名其學又說文序建光元年許冲上父慎說文曰古文孝經孝昭帝時魯國三老所獻建武時議郎衛宏所校皆口傳官無其說臣父學孔氏古文撰具一篇并上

孝經中契

孔丘作孝經文成而天道立乃齋以白之天則元雲涌北極

紫宮開北門角亢星北落司命天使書題號曰孝經篇目元神辰裔孔丘知元命使陽衢乘紫麟下告地主要道之君後年麟至口吐圖文北落郎服書魯端門隱形不見子夏往觀寫得十七字餘文二十消滅飛爲赤烏翔摩青雲御覽六百十路史

餘論
五

孝經右契

孔子夜夢豐沛之邦有赤烟氣起顏回子夏侶往觀之驅車到楚西北范氏之廟見芻兒捶麟傷其前折左足取薪而覆之孔子曰兒來汝姓爲誰曰吾姓爲赤松字時僑特名受紀孔子曰汝豈有所見乎曰吾所見一獸如麋者羊頭頭上有角其末有肉方以是西走孔子發薪下麟視孔子御覽引作兒發薪

下麟示趨而往麟蒙其耳吐書三卷孔子精而讀之初學記二十
孔子九御覽八
百八十九

孝經左契

將軍頤虎銜珠大夫正海出魚御覽二百三十七又二百七十五封於秦

山考績燔燎禱於梁父刻石紀號垂度示典功平政教此條已

見援神契篇

孝經威嬉拒

欲去惡鬼須具五刑令五人皆持大斧著鐵兜鍪驅之常使

去四五十步不可令近人也御覽二百五十六

按風俗通引黃帝書上古之時有茶與鬱壘昆弟二人性能執鬼度朔山上章桃樹下簡閱百鬼無道理妄為人禍

害茶與鬱壘縛以葦索執以食虎於是縣官常以臘除夕
飾桃人垂葦茭畫虎於門皆追放於前事冀以衛凶也桃
梗梗者更也歲終更始受介祉也

古微書卷三十終

古微書卷三十一

孝經內事圖

○按御覽引無圖字

賁居子曰古人之學圖居左書居右圖植物也書動物也書爲經而圖爲緯也互相質也緯書之有圖惟易次則春秋蓋皆有儀物可記列耳孝經無儀物安得有圖蓋天象元隱非圖莫著而終以其言隱也名之內事云

天子行孝德則景星見

○御覽八百七十二

按宋書符瑞志黃帝時有景雲之瑞有赤方氣與青方氣相連赤方中有兩星青方中有一星凡三星皆黃色以天清明時見於攝提名曰景星

王者動得天度止得地意從容中道陰陽合度則太微五帝

座星明以光也上○同

按晉志太微天子庭也黃帝座在太微中黃帝座不明人
主求賢士以輔法不然則奪勢

王者得禮之制不傷財不害民君臣和草木昆蟲各象正性

則三台為齊明不闊不狹如其度宋均曰君臣制度宮室車
旗多少各有科品則應也

上○同

按天官書魁下六星兩兩相比者名曰三能三能色齊君
臣和不齊為乖戾晉志云起文昌列抵太微西近文昌二
星曰上台為司命主壽次二星曰中台為司中主宗室東
二星曰下台為司祿主兵又泰階六符經曰泰階者天子
之三階上階上星為男主下星為女主中階上星為諸侯

三公下星爲卿大夫下階上星爲士下星爲庶人三階平則陰陽和風雨時不平則稼穡不成冬雷夏霜

王者遠嫌別微殊貴賤抑驕臣息亂子則屏星爲之明以潤帝座章而光

宋均曰屏星五帝座明以潤章大也○同上

按晉志屏四星在端門之內近右執法屏所以壅蔽帝庭也執法主刺舉臣尊敬君上則星光明潤澤

天子得靈臺之禮則五車均明河行不離其常

宋均曰天子考察天氣若

梓慎見星之蔽者也所以獲福禳災五車主五穀民禳災得福歲無飢寒之困五穀星之明以應之河若離常則有決溢之憂則五穀失所植矣○同上

按晉志五車者五帝車舍也五帝座也主天子五兵一曰主五穀豐耗西北大星曰天庫主太白金主秦次東北星曰

獄主辰星主燕趙次東星曰天倉主歲星主魯衛次東南
星曰司空主填星主楚次西南星曰卿星主熒惑主魏又
史記正義曰占五車三柱有變各以其國占之三柱入出
一月米貴三倍期二季出三月貴十倍一季柱入出不與
天倉相近軍出米貴轉粟千里

王者敬諸父有差則大角光明以揚

宋均云諸父伯仲叔季也斗為帝車所乘也角

堅剛而居帝前帝敬諸父感天應之也○同上

按天官書大角者天王帝廷正義曰大角一星在兩攝提
間人君之象也占其明盛黃潤則天下大同也

大角為坐候

宋均曰坐帝坐也○史記天官書索隱以為援神契文

昆弟有親親之恩則鉤鈐不離房

一作入房鉤鈐遠房則疏闊今昆弟相親故天相近

明其友也。御覽八百七十二。

按晉志亢東咸西咸各四星在房星北房之戶所以防佚淫也鍵閉一星在房東北鉤鈐主關鑰史記正義曰鈤鈐兩星以閑防神府占明而近房天下同心鈤鈐房星之間有客星出及踈折者皆地動之祥也亦曰地動河清

斗曲杓橈象成車房為龍馬華蓋覆鈤天罡八魁神不獨居故驂駕陪乘以道踟躕宋注曰房星既體蒼龍又象駕駟馬也天罡八魁又似侍御陪乘○續漢書輿服志注以為援神契文

按天官書斗為帝車運于中央臨制四鄉分陰陽建四時均五行移節度定諸紀皆繫於斗宋均云是大帝乘車巡狩故無所不紀也晉志云房為四表亦曰天駟為天馬主車駕南星曰左驂次

左服次右服次右驂亦曰天廢又主開閉為畜藏之所由也
 大帝上九星曰華蓋所以覆蔽大帝之坐也傳舍九
 星在華蓋上傳舍南河中五星曰造父其西河中九星如
 鈎狀曰鈎星直則地動 北落西南一星曰天綱主武帳
 北落東南九星曰八魁主張禽獸 王良五星在奎北居
 河中其四星曰天駟旁一星曰王良亦曰梁為天橋主禦
 風雨水道道前一星曰策星若移在王良前居馬後是謂
 策馬則車騎滿野閣道六星在王良前飛道也從紫宮至
 河神所乘也

歲星守心則年穀豐

○御覽五又三十五並以為援神契文

鎮星合房符明道

興太白合表四夷從服之象

○御覽八百七十二以為援神契文

黃氣抱日輔

臣納忠○二句已見

援神契篇

按容齋隨筆曰世之伎術以五星論命者大率以火土爲惡故有晝忌火星夜忌土星之語土鎮星也行遲每至一宮則二歲四月乃去以故爲災最久然以國家論之則不然苻堅欲南伐歲鎮守斗識者以爲不利史記天官書云五潢五帝車舍火入旱金兵水水宋均曰不言木土者德星不爲害也又云五星犯北落軍起火金水尤甚木土軍吉又云鎮星所居國吉未當居而居已去而復還居之其國得土若當居而不居旣已居之又西東去其國失其土居久其國福厚其居易福薄如此則鎮星乃爲大福德與木無異豈非國家休祥所繫非民庶可得侔耶

失義不德白虎不出禁或逆枉矢射山崩日蝕天子失仁太

白經天日食修孝山崩理惑

續漢書天文志五行志注並以爲鉤命決文

按禮記正義左傳昭三十一年十二月辛亥朔日有食之
庚午之日始有謫謫謂日之將食之氣氣見於上所以
責人君也梓慎曰二至二分日有食之不爲災也日月之
行也分同道也至相過也其他月則爲災陽不克也故常
爲水也然詩之十月則夏之八月秋分日食而爲災者以
辛卯之日卯往侵辛木反克金故爲災昭七年夏四月甲
辰朔日有食之而大咎衛君上卿四月夏之二月爲災者
以甲辰之日甲爲木辰爲土卯當克土今日食土反克木
故爲災也昭二十一年秋七月壬午朔而日食壬爲水午

爲火水應克火而日食火反克水不爲災者以秋七月夏之五月是壬午之時得有克壬之理故不得爲災

又按搜神記夏桀之時厲山亡秦始皇之時三山亡周顯王三十二年宋大邱社亡漢昭帝之末陳留昌邑社亡京房易傳曰山默然自移天下兵亂社稷亡也故會稽山陰瑯琊中有怪山世傳本琅邪東武海中山也時天夜風雨晦冥旦而見武山在焉百姓怪之因名曰怪山時東武縣山亦一夕自亡去識其形者乃知其移來今怪山下見有東武里蓋記山所自來以爲名也又交州脆州山移至青州凡山徙皆不極之異也尚書金縢曰山徙者人君不用道士賢者不與或祿去公室賞罰不由君私門成羣不救

當爲易世變號又曰日月薄蝕彗孛流飛此天地之危沴也寒暑不時此天地之蒸否也石立土踊此天地之瘤贅也山崩地陷此天地之癰疽也衝風暴雨此天地之奔氣也雨澤不降川瀆涸竭此天地之焦枯也

彗星出北斗兵大起在三台臣害君在太微君害臣在天獄諸侯作禍彗行所指其國大惡彗在日旁子欲殺父彗在月

中者君有德天下欣心大豐盛

○史記秦始皇紀正義御覽八百七十五

彗五彗也蒼則王侯破天子苦兵赤則賊起強國恣黃則女害色權奪於后妃白則將軍逆二季兵大作黑則水精賊江

河決賊處處起

○續漢書天文志注以爲宋注鉤命決文

按前漢志歲星贏而東南石氏見彗星甘氏不出三月遁

生彗本類星末類彗長二丈羸東北石氏見覺星甘氏不出三月迺生天棊本類星末銳長四尺縮西南石氏見橈雲如牛甘氏不出三月迺生天槍左右銳長數丈縮西北石氏見槍雲如馬甘氏不出三月迺生天橈本類星末銳長數丈石氏槍橈棊彗異狀其殃一也必有破國危君伏死其事餘殃不盡爲旱凶饑暴疾至日行一尺出二十餘日迺入甘氏其國凶不可舉事用兵出而易所當之國是受其殃又曰祆星不出五年其下有軍及失地若國君喪按晉志有祆星二十一而無雜妖隋志所集則庾季才靈臺祕苑也且志有雜妖又有星雜變文獻通考錄其雜變而遺雜妖併集于後

雜妖一曰天鋒彗象矛鋒者也主從橫天下從橫則天鋒
星見二曰燭星狀如太白其出也不行見則不久而滅燭
星所燭者城邑亂三曰蓬星狀如夜火之光在西南修數
丈左右兌出而易處又曰蓬星狀如粉絮見則天下道術
士當有出者布衣之士貴天下太平五穀成四曰長庚狀
如一匹布著天見則兵起五曰四填出四隅去地六丈餘
大而赤夜半時出見十月而兵起六曰地維藏光大而赤
去地二三丈如月始出東北隅天下大水出東南隅大旱
西南隅西北隅則兵大起以上亦見晉志七曰女帛變出東北水
木氣合也有大喪八曰盜星出東南火木氣合也多寇賊
九曰積陵出西北金水氣合也見則天下隕霜兵大起人

飢十日端星大而赤察之中黃數動長可四丈所出之氣
効于四季名曰四隅所出兵大起十一曰昏昌出西北氣
青赤見則國易政先起者昌後起者亡高十丈亂一年高
二十丈亂二年高三十丈亂三年十二曰華星出西北狀
有如環一星見則諸侯有失地十三曰白星有如星非星
狀如削瓜爲男喪十四曰菟昌出西北有青赤環之此星
見則天下改易十五曰格澤狀如火上黃下白從地而
上下大上銳見則不種而穫又曰此熒惑之變見則伏尸
流血期三年十六曰歸邪狀如屋非星如雲非雲見則必
有歸國者十七曰濛星夜有赤氣如牙旗長短四面西南
最多又曰刀星見則亂之象

星雜變一曰星晝見若星與日並出名曰嫁女星與日爭
光武且弱文且強女子爲王二曰恆星不見主不嚴法度
消又曰天子失政諸侯橫暴三曰星鬪天下大亂四曰星
搖人衆將勞五曰星隕陽失其位災害之萌又曰衆星墜
人失其所也又曰奔星之所墜其下有兵列宿之所墜滅
家邦衆星之所墜衆庶亡又曰填星墜海水佚黃星騁海
水躍

古微書卷三十二

河圖緯

賁居子曰緯候之興其生於河出圖一語乎自前漢世有河圖九篇洛書六篇云自黃帝至周文王所受本文又別三十篇云自初起至於孔子九聖增演以廣其意蓋七緯之祖本也顧漢志馬鄭皆不道及惟梁崇文隋經籍有二十卷今讀其文淵且豔也其錄則曰括地象曰絳象曰始開圖皆以鉤山河之蹟曰帝覽嬉曰稽耀鉤皆以扶星象之元曰挺佐輔曰握矩記皆以闡運歷之要而又有帝通紀真紀鉤著命祕徵要元考燿殘篇半牘錯海希珍遇之輒疏矣殆視諸緯爲富云

河圖括地象

昔禹治水得括地象此其傳之最古也

易有太極是生兩儀兩儀未分其氣混沌清濁既分伏者為

天偃者為地

○初學記一爾雅釋天疏

又曰元氣無形洵洵隆隆偃者為

地伏者為天

○御覽一又三

天地精通神明列序

○初學記五

元氣闡陽為天

○後漢書方術傳注御覽一引河圖又書鈔百四十九以為河圖叶光篇文

積精

為日

○類聚一以為河圖叶光篇文

天不足西北地不足東南西北為天門東南為地戶天門無

上地戶無下

注天不足西北是天門地不足東南是地戶○地官大司徒疏

天左動起于牽牛地右動起于畢

○同上

天有四表以布精魄地有四瀆以出圖書

○後漢書班固傳注

天有五行地有五岳天有七星地有七表天有八氣地有八

風天有九道地有九州天有四維地有四瀆天有九部八紀

地有九州八柱○初學記五又八類聚六御覽三十六又百五十七

按淮南子東北為報德之維西南為背陽之維東南為常

羊之維西北為號通之維

天下九州內效中域以盡地化○初學記八地中央曰崑崙崑崙

東南地方一萬五千里名曰神州中有五岳地圖帝王居之

○禮曲禮下疏文選魏都賦注初學記八御覽百五十七八極之廣東西二億三萬三千

里南北二億三萬一千五百里夏禹所治四海內地東西二

萬八千里南北二萬六千里有君長之州有九阻中土之文

德及而不治○類聚六御覽三十六

崑崙之墟下洞舍右赤縣之州是為中則東南神州曰晨土
 正南邛州曰深土西南戎州曰滔土正西弇州曰开土正中
 冀州曰白土西北柱州曰肥土北方元州曰成土東北咸州
 曰隱土正東揚州曰信土

傳注初
 學記八

晨亦作農深一作沃白一作中元
 一作濟信一作申○後漢書張衡

按淮南子九州之外乃有八殞亦方千里自東北方曰大
 澤曰無通東方曰大渚曰少海東南方曰旻區曰元澤南
 方曰大夢曰浩澤西南方曰資渚曰丹澤西方曰九區曰
 泉澤西北方曰大夏曰海澤北方曰大冥曰寒澤凡八殞
 八澤之雲是雨九州八殞之外而有八紘亦方千里自東
 北方曰和邱曰荒土東方曰棘林曰桑野東南方曰大窮

曰衆女南方曰都廣曰反戸西南方曰焦僥曰炎土西方
曰金邱曰沃野西北方曰一目曰沙所北方曰積冰曰委
羽凡八絃之氣是出寒暑以合八正必以風雨八絃之外
乃有八極自東北方曰方土之山曰蒼門東方曰東極之
山曰開明之門東南方曰波母之山曰陽門南方曰南極
之山曰暑門西南方曰編駒之山曰白門西方曰西極之
山曰閭闔之門西北方曰不周之山曰幽都之門北方曰
北極之山曰寒門凡八極之雲是雨天下八門之風是節
寒暑八絃八殞八澤之雲以雨九州而和中土

賁居子曰昔聞神農之治地過日月之表此或神農之
九州與蓋其說祖于鄒衍衍謂中國於天下乃八十一

分之一耳中國外九州各有裨海環之如此者九乃有大瀛海環其外天地之際焉頗似佛說四天下及須彌山王三千大千之說而要其言以海爲環則依然中夏之習見也近世有利瑪竇自歐羅巴國越八萬里泛海而來其言海外大國猥多而西視神州目爲大明海居地才百之一則瀛海之外豈遂無方輿哉鄒子之言尙猶蠻觸也顧漢儒括地志全述其文而隋代郊祀至以九土列祀位亦可謂好大不經矣

凡天下有九區別有九州中國九州名赤縣神州卽禹之九州也上云九州八柱卽大九州也非禹貢赤縣小九州也○

學記五
引河圖

崑崙山爲天柱氣上通天崑崙者地之中也地下有八柱柱廣十萬里有三千六百軸互相牽制名山大川孔穴相通文

遷海賦注初學記
五御覽三十六

按關令內傳地厚萬里其下得大空大空四角下有自然金柱輒方員五千里

地南北三億三萬五千五百里地部之位起形高大者有崑崙山從廣萬里高萬一千里神物之所生聖仙之所集也出五色雲氣五色流水其白水東南流入中國名曰河也其山中應于天最居中八十城布繞之中國東南隅居其一分是奸城也志一博物崑崙之山爲地首上爲握契滿爲四瀆橫爲地軸上爲天鎮立爲八極一本作柱
御覽三十八

崑崙之墟有五城十二樓河水出焉四維多玉○類聚七引河圖又御覽

三十八以為河圖始闢圖文

崑崙山有五色水赤水之氣上蒸為霞而赫然○此條原刻共脫七字今

校增○文選蜀都賦注御覽八

崑崙有柱焉其高入天即所謂天柱也圍三千里圓如削下有仙人九府治與天地同休息其柱銘曰崑崙銅柱其高入

天圓周如削膚體美焉○語見水經河水注

按山海淮南怪談崑崙無異佛氏之侈須彌山也道家又以蓬萊為崑崙茲不具述惟赤寔一經相傳為張子房要其說地脈山原殊為奧窔其文曰崑崙柱天萬脈繇起西北綿亘幽塞莫詣為背為項為脊為囊下為鬣鬣上為髮

際面居秦雍耳目口鼻幽冀川蜀分左右背懸心關腦腹
垂洛汭胃脘出納爲汧爲渭大河大江經絡榮衛大腸膀
肱震澤壘濟青徐以降是爲魄脾泄爲尾閭茫洋無際海
洲萬國冀滓塵穢

嶧冢山上爲狼星武關山爲地門上爲天高星主罔圖荆山
爲地雌上爲軒轅星大別爲地理天以合地以通三危山在
烏鼠之西南上爲天苑星岐山在崑崙東南爲地乳上爲天
麋星汶山之地爲井絡一曰汶阜之山江出其腹帝以會昌
神以建福上爲天井星桐柏山爲地穴上爲維星烏鼠同穴
山地之幹也上爲掩畢星熊耳山地之門也精上爲畢附耳

星

○初學記六類聚七御覽三十八又
四十四又四十二又四十三又四十九

太行山天下之脊

三危山黑水出其南

○御覽五十

岐山上多白金周之興也鸞鷲鳴于岐山時人亦謂岐山為

鳳凰堆

○御覽四十

瀛州多積石其名曰昆吾鍊之成鐵以作劍光明如水晶石

蓋鐵升也

○史記司馬相如傳索隱

嶓冢山上有異花草名骨容食之無子

○御覽四十

德布精上為衆星

○後漢書光武紀注御覽七

河精上為天漢

○詩小雅大東

疏大雅雲漢疏史記天官書索隱文選魏文帝雜詩注

井絡纏曜江漢炳靈泉流深遠盛為四瀆之首

○語見水經江水注

按張華敘神異經曰崑崙有銅柱焉其高入天所謂天柱

也圍三千里員周如削下有迴屋仙人九府治上有大鳥
名曰希有南向張左翼覆東王公右翼覆西王母背上小
處無羽一萬九千里西王母歲登翼上之東王公也故其
柱銘曰崑崙銅柱其高入天員周如削膚體美焉其鳥銘
曰有鳥希有喙赤煌煌不鳴不食東覆東王公西覆西王
母王母欲東登之自通陰陽相須唯會益工
河圖始開圖

漢武按古圖書始名河所出曰崑崙張騫未之見也唐
薛元鼎使吐蕃得源于悶磨黎山中亦非其真勝元命
都實往求之朶甘思西鄙有泉百泓行二十日至朶甘
思東北有大雪山始名崑崙則河源非崑崙明矣豈上

古聖人亦有目力足踐所未及者乎失之古得之今失之中華得之夷戎學然後知不足也

黃帝問風后曰余欲知河之始開風后曰河凡有五皆始乎

崑崙之墟

○御覽六十一

黃河出崑崙東北角剛山東以北流千里折西而行至蒲山南流千里至文山東流千里至秦澤西流千里至潘澤陵門東北流千里至華山之陰東流千里至于植雍南流千里至於下津然河水九曲其長九千里入于渤海

水經注黃河百里一小曲千里

一曲一直○初學記六引河圖無至文山以下二十四字似於水道為合又植雍下南作北下津下無然字與絳象篇同

崑崙山北地轉下三千六百里有八元幽都方二十萬里地

下有四柱廣十萬里地有三千六百軸犬牙相舉

○博物志一以為河

圖括地象文舉作
牽據連江葉氏本

按十三洲說崑崙山正在西海之戌地北海之亥地去岸
十三萬里有弱水周迴繞匝山南接積石圃西北接北戶
之室東北臨大活之井西南至承淵之谷此四角大山實
崑崙之支輔也積石圃南頭昔西王母告周穆王去咸陽
三十六萬里山高平去地三萬六千里上有三角面方廣
萬里形如偃蓋上有金臺玉闕亦元氣之所合天帝君所
治處也 閱此說則穆天子傳之崑崙卽水經所謂高一
萬一千里者而山海之崑崙止云廣八百里當別一小崑
崙矣

黃泉之埃上爲黃雲青泉之埃上爲青雲赤泉之埃上爲赤

雲白泉之埃上爲白雲元泉之埃上爲元雲〇御覽八

此卽淮南子正土御埃天之說

九州殊題水泉剛柔各異青徐角羽集寬舒遲人聲緩其泉
鹹以酸荆揚角徵會氣漂輕人聲急其泉酸以苦梁州商徵
接剛勇漂人聲騫其泉苦以辛兗豫宮徵合平靜有慮人聲
端其泉甘以苦雍冀合商羽端駛烈人聲捷其泉辛以鹹〇初

學記八御覽百五十七引河圖

按管子夫齊之水道躁而復故其民貪麤而好勇楚之水
淖弱而精故其民輕果而賊越之水濁重而洎故其民愚
疾而垢秦之水泔最而稽淤滯而雜故其民貪戾罔而好
事晉之水枯旱而運淤滯而雜故其民諂諛而葆詐巧佞

而好利燕之水萃下而弱沈滯而壅故其民愚戇而好貞
輕疾而易死宋之水輕勁而清故其民簡易而好正
淮南子汾水濛濁而宜麻濟水通和而宜麥河水中濁而
宜菽雒水輕利而宜禾渭水多力而宜黍漢水重安而宜
竹江水肥仁而宜稻平土之人慧而宜五穀 夫水味之
別則然矣論其極則庭州灞水金鐵皆漏鄜延之川白脂
日流弱水溺毛黑溪元髓悉唐制角畔怯腐手水性不同
有如此者其說曰庭州灞水在大荒之外金鐵承之皆漏
惟角與瓠葉則否拘夷山中有流水亦如之鄜延卽延安
石油也以爲烟墨松脂不及詳注石燭黑溪在南荒以其
水塗石象至輒不去昆侖以此塗身卽能乘象如家畜古

所謂黑昆侖今之象奴也悉唐晔怯見佛書中

賈居子曰水一耳泉何以品乎聲何以析乎則本草之辨水其濫爾乎蒲元之驗涪水雜以二斗亦知其非蜀江張茂先之察江心問洛中篙師一皆首服但不識桑苧翁從此會否張又新品水抑又亞之

河圖絳象

僧一行曰天下山川存乎兩戒北紀河源南紀江源然而河獨與雲漢相始終歷歷其所流所直莫非星也故河有圖江不聞焉有天下者保河則強墜江則弱

河導崑崙山名地首上爲權勢星一曲也東流千里至規其山名地契上爲距樓星二曲也祁南一作北流千里至積石山名

地肩上爲別符星三曲也。邠南千里入隴首山間抵龍門首名地根上爲營室星四曲也。龍門上爲王良星爲天橋神馬出河躍南流千里抵龍首至卷重山名地咽上爲卷舌星五曲也。東流貫砥柱觸闕流山名地喉上爲樞星以運七政六曲也。西距卷重山千里東至雒會名地神上爲紀星七曲也。東流至大伾山名地肱上爲輔星八曲也。東流至絳水千里至大陸名地腹上爲虛星九曲也。

按河水發源有土蠻星宿海之說。故緯書按天星以名其流。要之上爲星辰下爲河漢。凡江淮之瀆無不與星辰應也。

黃河出崑崙東北流千里折西而行。至於蒲山南流千里至

於華山之陰東流千里至於桓雍北流千里至於下津河水

九曲長九千里入於渤海

○郭茂倩樂府九十一引河圖

此文已見始開圖而語少畧因楊用修引為絳象故錄于

此

邠之隘上為扶桑日所升宣陸之阻上為吳泉月所登

按山海經紀日月之出者七日月所入五日月所出入一

其紀日月之出也曰大言山曰合虛山曰明星山曰鞠陵

山曰湯谷扶水曰猗天蘇門山曰壑明俊疾山皆在大荒

東經其紀日月之入曰豐沮玉門山曰日月山天樞也曰

鑿鑿鉅山曰常陽山曰大荒山皆在大荒西經曰浴日一

在大荒南經之甘淵曰浴月一在大荒西經之元丹山其

紀日月所出入一在大荒西經之方山柜格之松焉考之淮南子曰所出入又多不同存而不論亦可也

太湖中洞庭山林屋洞天卽禹藏真文之所一名包山吳王闔閭登包山之上命龍威丈人入包山得書一卷凡一百七十四字而還吳王不識使問仲尼詭云赤鳥銜書以授王仲尼曰昔吾遊西海之上聞童謠曰吳王出遊觀震湖龍威丈人名隱居北上包山入靈墟乃造洞庭竊禹書天帝大文不可舒此文長傳六百初今強取出喪國廬丘按謠言乃龍威丈人洞中得之赤鳥所銜非丘所知也吳王懼乃復歸其書

按靈寶要畧

○按下文見雲笈七籤第三卷靈寶略紀中疑要略二字有誤

昔太上以靈

寶五篇真文以授帝。帝嘗將仙，封之於鍾山。至夏，禹巡狩，度弱水，登鍾山，遂得是文。後復封之包山、洞庭之室。吳王闔閭出遊包山，見一人自言姓山，名隱居，闔閭叩之，乃入洞庭，取素書一卷呈闔閭。其文不可識，令人齋之，問孔子。孔子曰：「丘聞之童謠云：吳王出遊，觀震湖，龍威丈人山隱居北，上包山，入靈墟，乃入洞庭，竊禹書天地。」○七錄大文不可舒，此文長傳百六。初，若強取出，喪國廬。闔閭乃尊事之。

越絕書：禹治洪水，至牧德之山，見神人焉。謂禹曰：「勞子之形，役子之慮，以治洪水，無乃怠乎？」禹知其神人，再拜請誨。神人曰：「我有靈寶五符，以役蛟龍水豹，子能得之，不日而

就因授禹而誠之曰事畢可祕之於靈山禹成功後乃藏之于洞庭包山之穴至吳王闔閭之時有龍威丈人得符獻之吳王以示羣臣皆莫能識乃令齋符以問孔子孔子曰昔禹治水于牧德之山遇神人授以靈寶五符後藏於洞庭之包山君王所得無乃是乎赤鳥之事某所未詳使者反白闔閭乃尊事之先是江左童謠云禹治洪水得五符藏之洞庭包山湖龍威丈人竊禹書得五符者喪國廬尋而吳果滅

按越絕書無此文

孔子入吳信有之包山之謠亦必有自而第云靈寶五符則或出附會者之口也

古微書卷三十二

古微書卷三十三

河圖稽耀鉤

稽耀曰鉤以言乎元象之窈裔無不覩也

五星散為五色之彗

御覽八十七百七十五

歲星之精流為國皇主內難

御覽七又八十七百七十五

太白散為天狗主候兵

辰星散為柱矢流枉

矢所射可誅

熒惑散為蚩尤旗主惑亂

同上並

填星散為獄

漢又為五殘主奔亡又為旬始主招橫

御覽八十七百七十五

又為虹蜺

主內淫又霓者氣也起在月側其色青赤白黃

御覽十四

歲星

之精流為天梧天槍天猗天衝國皇及登蒼彗熒惑散為昭

旦蚩尤之旗昭明司危天欃赤彗填星散為五殘獄漢大賁

昭星絀流旬始蚩尤虹蜺擊咎黃彗太白散為天杵天柎伏

靈大敗司姦天狗天殘卒起白彗辰星散爲枉矢破女拂樞
滅寶繞經驚理大奮祀黑彗五色之彗各有長短曲折應象

○晉書
天文志

日月兩重暈者饑之祥也

○御覽三十
五引河圖

蟾蜍去月天下大亂

○御覽九百四
十九引河圖

月犯房天子有憂四足之蟲多死月犯心後星亂臣在旁

○續

漢書天文志
注引河圖

青雲刺月五穀不熟旁多赤雲如人頭大戰月旁有白雲如
杵者三貫月六十日內有兵戰月始出有黑雲貫名激雲不
出三日大雨

○御覽八百七
十七引河圖

彗星出貫奎庫兵悉出禍在強侯外夷胡應逆首謀也

○續
漢書

天文志注
引河圖

枉矢東流天下恐

○御覽八百七十五引河圖

按晉史志妖星二十有一一曰彗星二曰孛星三曰天棓
四曰天槍五曰天欒六曰蚩尤旗七曰天衝八曰國皇九
曰昭明十曰司危十一曰天譴十二曰五殘十三曰六賊
十四曰獄漢十五曰旬始十六曰天鋒十七曰燭星十八
曰蓬星十九曰長庚二十曰四填星二十一曰地維藏光
賁居子曰天棓天槍皆紫垣門內之宿似不得爲妖女
孛本黃帝時一女子修行不得其死蚩尤則黃帝所誅
者而復能爲妖于天亦可詫也

又按晉志流星之類有音如炬火天保也所墜國有喜若
小流星青赤名地鴈所墜有兵其光青赤長三丈名天鴈

軍中之精華也其飛星大若缶若甕後皎然白前卑後高此謂頓頰多死亡或大若缶甕星滅後白者曲環如車輪此謂解御其國人相斬爲爵祿飛星如前白者化爲車輪下名曰大滑下有流血又云東南有三星出名曰盜星出則天下有大盜西南有三大星出名曰種陵出則天下穀貴十倍西北有三大星出而白名天狗出則人相食大凶東北有三大星出名曰女帛見則有大喪

黃黑氣掩日是爲日薄凡日食皆於晦朔有不於晦朔者爲日薄雖非日月同宿時陰氣盛掩日光也占類日食

○晉書天文志

宋書五行志引河圖占

月犯心有亂臣王者惡之又宮中有亂又有大喪犯中星爲

人主犯前星爲太子犯後星爲庶子當之

河圖帝覽嬉

猶云覽德輝而嬉悅爾

黃道一青道二出黃道東赤道二出黃道南白道二出黃道
西黑道二出黃道北曰春東從青道夏南從赤道秋西從白
道冬北從黑道立春星辰西遊日則東遊立夏星辰北遊日
則南遊春分星辰西遊之極日東遊之極日與星辰相去三
萬里夏至則星辰北遊之極日南遊之極日與星辰相去三
萬里立秋星辰東遊日則西遊立冬星辰南遊日則北遊秋
分星辰東遊之極日西遊之極冬至星辰南遊之極日北遊
之極相去各三萬里

○禮月令疏
爾雅釋天疏

按漢志日有中道月有九行中道者黃道一曰光道光道
夏至北至于東井北近極故晷短冬至南至于牽牛遠極
故晷長春秋分日東至角西至婁去極中而晷中日行不
可指而知也故以二至二分之星爲候日東行星西轉冬
至昏奎八度中夏至氏十三度中春分柳一度中秋分牽
牛三度七分中此其正行也日行疾則星西轉疾事勢然
也

又按隋志日循黃道東行行東陸謂之春行南陸謂之夏
行西陸謂之秋行北陸謂之冬

又中興天文志占天之法以二十八宿爲綱維分列四方
南北去極各九十有一度

○按此下原有冬則南遊春分
星辰西遊之極三十有六度一

星辰相去三萬里夏至則星辰北遊凡三十二字與上下文不相屬今以意刪又此下似脫日道二字半在

赤道內半在赤道外出入內外極遠者皆二十有四度以
其行赤道之中者名之曰黃道凡五緯皆隨日緣黃道行
惟月之行有九道四時交會歸於黃道而轉變焉故有赤
青白黑四者之異名然唐志又云黃道春分與赤道交於
奎秋分交於軫西南至斗北至井與漢志殊蓋赤道分天
之半今古不易黃道本無定體因日行而為之名日之行
也每歲有差古今所以不同也

月未當望而望是謂促兵宜攻他人月當望而不望攻他人
者有殃所宿之國亡地十一占經

月暈而珥六十日兵起不暈而珥人主有喜兵在外亦喜原

刻人主二字誤作全字亦
誤作而並依占經改正 月不暈有四璣者臣有謀不成月

暈三重天下受兵赤雲貫之其下亡地月暈四重其下亡國

凶月暈六重其下亡國月暈九重其下兵起流亡五月中暈

有九重以上者道上有熱死人地將動月犯太白○占經犯作暈其

野受兵戰不勝又云所守之國兵起月暈太白與日共其分

主憂星出月陰負海國勝列星貫月陰國可伐○占經十二又十三又十

五

大星流入月中無光有兵死又曰使星八月主失其地若星

八月中無光將戮

彗星在月胡兵大起

彗出東方河逆決將相有謀

月食從上始謂之失國國君當之從旁始謂之失令相當之

從下始謂之失律將軍當之○占經十七失國作失道

從上下始謂之赤子食其陰為女其陽為男○占經十七引從上始為君觀

從下始為赤子此首句有脫文

月行南河兵旱並起男子喪○占經十四

月犯太白強侯作亂以戰不勝○占經十二

月暈辰星春夏民有寒熱疾秋兵起冬其下並憂○占經十五

月犯南斗兵起中國

月犯心有亂臣王者惡之又曰宮中有亂

月暈胃民多腹疾貴臣死若熒惑在胃中則有兵歲令在暈

中有德令火入太微中留止為兵火起

河圖挺佐輔

此其符命之祖乎河洛易緯各載此事而文不一則雖無其文未必無其事也

伏羲禪於伯牛鑽木作火

○御覽八
百六十九

黃帝修德立義天下大治乃召天老而問焉余夢見兩龍挺白圖卽帝以授余於河之都覺昧素善不知其理敢問於子天老曰河出龍圖雒出龜書紀帝錄列聖人之姓號興謀治平然後鳳凰處之今鳳凰以下三百六十日矣古之圖紀天其授帝圖乎試齋以往視之黃帝乃被齋七日夜黃衣冠黃冕駕黃龍之乘戴交龍之旗天老五聖皆從以遊河洛之間求所夢見之者弗得至於翠嬀之淵大鱸魚折溜而至乃問

天老曰子見夫中河折溜○按折溜御覽並作泝流者乎曰見之顧問五

聖皆曰莫見乃辭左右獨與天老跪而迎之魚汎白圖蘭葉

朱文五色畢具天老以授黃帝舒視之名曰錄圖○初學記六類聚十

一御覽七十九

錄圖曰渾渾嗚嗚莽莽雉雉萬物盡化○文心雕龍封禪篇

天授元始建帝號黃龍負圖鱗甲成字從河中出付黃帝令

侍臣寫以示天下○類聚九十八御覽七十九並以爲龍魚河圖文

黃帝遊於洛見鯉魚長三丈○按御覽引作三尺青身無鱗赤文成字

○初學記六又三十御覽九百三十六

堯時與羣臣賢智到翠嬀之川大龜負圖來投堯堯勅臣下

寫取告瑞應寫畢龜還水中○類聚九十九御覽八十並以爲龍魚河圖文

舜以太尉卽位與三公臨河觀黃龍五采負圖出置舜前以

黃玉爲柙白玉爲檢黃金爲繩黃芝爲泥章曰天黃帝符璽

○初學記六又三十類聚九十八御覽九百二十九引河圖又曰黃龍從雒水出詣虞舜

鱗甲成字舜令寫之寫畢竟去舜以土德故一曰黃帝○初學記三十御覽九百二十九

引河圖一作文竟龍去○類聚九十八引龍魚河圖云令左右寫文竟龍去

禹治水功大天帝以寶文大字賜禹佩渡北海免弱水之難

○初學記九引河圖

自此百世之後地高天下山陵消去不風不雨不寒不暑民

復食土皆知其母不知其父如此千歲之後而天可倚杵洵

洵隆隆曾莫知其始終○初學記一御覽二又三十六又三十七

按正法經天圓十二綱地方十二紀天綱運闕三百六十

輪爲一周地紀推機三百三十輪爲一度天運三千六百
周爲陽勃地轉三千三百度爲陰蝕天氣極於太陰地氣
窮於太陽故陽激則勃陰否則蝕陰陽勃蝕天地氣反天
地氣反乃謂之小劫天運九千九百周爲陽蝕地轉九千
三百度爲陰勃陽蝕則氣窮於太陰陰勃則氣極於太陽
故陰否則蝕陽激則勃陰陽蝕勃則天地改易天地改易
謂之大劫

運度經云靈寶自然運度有大陽九六百六也小陽九小
百六也三千三百年爲小陽九小百六也九千九百年爲
大陽九六百六也夫天尻謂之陽九也地虧謂之百六也
至金天氏之後甲申之歲是其天地運度否泰所終陽九

百六會至時道德方明兇醜頓肆聖君受任於壬辰之年也

皇氏譜錄曰自三象明曜已來至以累億劫會天地成敗非可勝載數極唐堯是爲小劫丁亥之後甲申之年陽九百六二氣離合壬辰之始數有九周至庚子之年赤星見於東方白搏見於月窟唐堯之後四十六丁亥是三劫之周又五十五丁亥至壬辰癸巳是大劫之周也六合冥一二道盈虧時運周劫始轉一仙階

賈居子曰陽九百六之說僅見於道藏故備志之康節先生妄以十二時分元會運世而以堯舜世爲已中宋受命遂當申初恐天地之大終難以年代限也

河圖握矩記 一作矩起

五運三正安有常期謂之握矩者明乎皇帝王之迭興各有禎符若春規夏準秋矩冬權可象鑑而不謬也

燧人之世大迹在雷澤華胥履之而生伏羲 ○御覽七十二又百三十五

一云伏羲在亥得人定之時 ○山海經海內東經注御覽百三十五引河圖

伏羲禪於伯牛鑽木作火 ○御覽七十八引河圖按此文已見挺佐輔篇

黃帝名軒北斗黃神之精母地祇之女附寶之郊野大電繞

樞斗星耀感附寶生軒轅胥文曰黃帝子 ○御覽七十九 又附寶之

郊見電繞斗軒星照郊野感而生軒 ○路史黃帝紀注 又黃帝母曰

地祇之子名附寶之郊野大電繞北斗樞星耀感附寶生軒

轅 ○御覽百三十五引河圖

令訾野中有玉虎晨鳴雷聲聖人感期而興又黃帝以雷精

起○並御覽十三玉虎晨鳴雷聲也○此句已見上文重出

大星如虹下流華渚女節意感生白帝朱宣朱宣少昊氏○文選策秀才文

注後漢書賈逵傳注初學記一御覽七又七十九引河圖瑤光之星如虹貫月正白感女

樞於幽房之宮生黑帝顓頊首戴于戈有德文○初學記九御覽七十九

又百三十引河圖又曰帝乾荒擢首而謹耳獬喙而渠股是襲若水

取蜀山氏曰樞是為河女所謂淖子也淖子感瑤光於幽房

而生顓頊○語見路史高陽紀

扶都見白氣貫星感生黑帝湯○御覽八十三引河圖星作月

姜嫄履大人之跡生后稷太姒夢大人死而生文王○詩生民疏禮

祭法疏引河圖

賁居子曰天之生奇杰瑰偉如其生怪石生妖禽偶感
異氣而出或于中夏或于蠻荒或爲尤物或爲英人亦
不計其爲帝爲王也如哀牢之觸沈木夜郎之流竹孔
廩君之涌土穴徐偃之生暇牟或不繇血氣不經人道
咸自卓然何必爲天下主而後有奇徵哉且如桓靈寶
之么麼而當其母誕時亦感屋墜銅盆吞之有娠使其
後竟受僞命豈不與瑤光薏苡同一瑞也然亦有漠然
無瑞而爲世雄霸者矣意者天之間氣其偶然而集而
不可以概世類乎若曰天知有帝王而福之則佛說萬
八千天子恐不勝其休祥之煩

少昊秀外龍庭月縣通頤顛頊渠頭併幹通眉帶午帝鬻餅

齒方頤龐覲珠庭此齒戴干

○語見路史後紀惟無齟齒二字按此齒即齟齒也二字衍

一本帝嚳齟齒上法日參秉度成紀以理陰陽

○路史高辛紀注

蒼帝方面赤帝圓面白帝廣面黑帝深面

○御覽三百六十五引河圖

黃

帝廣額龍額

○御覽三百六十四引河圖

黃帝兌頤黑帝修頸蒼帝並乳

○御覽三百六十八又三百六十九又三百七十一引河

圖

黃帝望之大視之博白帝望之明視之義

○書鈔一引河圖

風后曰予告汝帝之五旗東方法青龍曰旗南方法赤鳥曰

旗西方法白虎曰典北方法元蛇曰旗中央法黃龍曰常

○初

學記二十二御覽三百四十一引河圖旗作旗典作旗

帝命伯禹曰告汝九術五勝之常可以克之汝能從之汝師

徒將與○御覽八十二
路史夏后紀

黃帝曰凡人生一日天帝賜算三萬六千又賜紀二千聖人
得三萬六千七百二十凡人得三萬六千一紀主一歲聖人

加七百二十○初學記十七御
覽四百一引河圖

孝順二親得算二千天司錄所表事賜算中功○初學記十
七引河圖

按太上感應篇天地有司過之神依人所犯輕重以奪人
算算減則貧耗算盡則死又有三台北斗神君在人頭上
錄人罪惡奪其紀算大則奪紀小則奪算人生而不自愛
者其亦負上帝之賜多矣

黃金千歲生黃龍青金千歲生青龍赤金千歲生赤龍白金
千歲生白龍元金千歲生元龍○初學記三十類聚九十八
御覽九百二十九引河圖

此卽淮南子五龍五頊之說已錄前運斗樞篇

黃帝生先致白狐○類聚九十九黃帝作白帝

秦距之帝名政虎口日角大目隆鼻長八尺六寸身大七圍

手握兵執矢○御覽八十

怪目勇敢重瞳天雨刀於楚之邦宋均曰講項羽○御覽八十七又三百四十五又四

百三十三引河圖

帝劉季日角戴勝斗胸龜背龍眼長七尺八寸明聖而寬仁

好生主軫劉受紀昌光出軫五星聚井○史記高祖紀正義御覽八十七引河圖

並無好生主軫四字按此文又見提劉篇

河圖雜緯篇

河圖祕徵

帝貪則政暴而吏酷酷則誅深必殺主蝗蟲○續漢書五行志

主急妄怒失陽事則天無雲而雨○御覽八十七

黃帝起大蚘見○御覽九百四十七

帝失德政不平則月生足又陪臣擅命羣下附和則月舉足

垂爪○觀象玩占四

河圖帝通紀

雲者天地之本也雨者天地之施也風者天地之使也雷者

天之鼓彗星者天之旗○御覽八又九又十一又十三又八百七十五

河圖著命○按御覽引作著命苞

瑤光之星如虹貫月正白感女樞於幽房之宮生黑帝顓頊

○初學記二十三握登見大虹意感生舜於姚墟○御覽百四書鈔二十三修

已見流星意感生帝戎文禹一名文命 扶都見白氣貫日

意感生黑帝子湯○按御覽日月作月 太姒夢長人意感生文王○同上

河圖真紀鉤

王者封泰山禪梁父易姓奉度繼典崇功者七十有二君○初

學記十三類聚三十九書鈔九十一御覽五百三十六

河圖要元篇

句金之壇其間有陵兵病不起洪波不登○真諧十一起作往 又曰乃

有地脈○真諧作地肺 土良水清句曲之山金壇之陵○此四句又見御覽百七

十可以度世上昇曲城要元篇蓋漢世緯書後漢書注不載其目今見茅山志○真諧十一以為

河圖內元經文

河圖考靈曜一作考曜文

秦王政以白璧沈河有黑頭公從河出謂政曰祖龍來授天

寶開中有尺二玉牘○初學記六
御覽八百六

高皇攝政總萬廷四海歸詠理威明文德道化承天精元祚

興隆協聖靈○初學記九引河圖按
此條又見龍魚河圖篇

河圖提劉篇

帝季日角戴勝斗胸龜背龍眼長七尺八寸明聖寬仁好士

主軫○類聚
十二

河圖稽命徵

帝劉卽位百七十年太陰在庚辰江充詭其變天鳴地坼○御

覽八百
七十四

河圖會昌符

漢大興之道在九代之王封於太山刻石著紀禪於梁父退

省考功○類聚三十九

河圖曰漢高祖親祀汶水見一黃金却驚反化為一翁責言

劉季何不受河圖○御覽七百五十七

河圖龍文曰鎮星光明八方歸德○文選三都賦序注倣白馬篇注石闕銘注赤

九會昌十世以光十一以興○後漢書曹褒傳續漢書律歷志引河圖九名之世

帝行德封刻政○續漢書律歷志又祭祀志以為河圖合古篇文

古微書卷三十三

古微書卷三十四

河圖玉版

緯之說兆于河圖故僭河圖者益衆而濫河圖者益陋
索之緯錄未聞有玉版者類書徵集顧有數條或亦其
流沿之舊與

倉頡爲帝南巡狩登陽虛之山臨于元扈洛汭之水靈龜負
書丹甲青文以授之○水經洛水注帝文止二十八字景刻于陽虛
之石室李斯止識八字曰上天垂命皇辟迭王今已不可尋
矣

按金陵志注云昔周初有於倉頡墓下得石刻藏之書府
至秦李斯辨其八字云上天作命皇辟迭王或云叔孫通

識十一字而不傳妄也任昉云周人不能辨而斯通識之

余不信也詳考二句乃寇謙所纂黑帝安和國王禁文也

湘夫人者帝堯女也秦始皇浮江至湘山逢大雨

○山海經注作風與

史記合

而問博士湘君何神博士曰聞之堯二女舜妃也死而

葬此

○山海經注

按禮記舜南巡狩蓋三妃未之從也郭璞注山海經云明

妃后生不從征死不從葬義可知也列女傳二女死於江

湘之間又楚辭有湘君湘夫人遂比之慮妃洛神名實相

亂矣及閱禮記所注三妃者謂宵明燭光癸比不謂娥英

也山海北經又云舜妻登比氏生宵明燭光處河大澤二

女之靈能照此所方百里則曲禮之三妃抑何其誣總之

好古尊聖者務侈其說而遂以爲聖人之眷屬皆系神靈
其實皆無可指耳

禹平治天下會諸侯會稽之野防風氏後到殺之夏德之盛
二龍降之禹使范成光御之行域外旣周而還至南海經防
風防風之神二臣以塗山之戮見禹使怒而射之迅雷風雨
二龍昇去二臣恐以刃自貫其心而死禹哀之乃拔其刃療
以不死之草是爲穿胸民

○語見博物志二

古越俗祭防風神奏防風古樂截竹長三尺吹之如嗥三人
披髮而舞

左傳文公十一年鄭瞞侵齊叔孫得臣獲長狄僑如注云
鄭瞞漆姓北方長狄也在夏爲防風氏殷爲汪芒氏

賁居子曰今之北狄幸而無是種也神哉大禹蓋亦慮後世而震赫其武與

從崑崙以北九萬里得龍伯國人長三十丈生萬八千歲而死從崑崙以東得大秦國人長十丈皆衣帛從此以東十萬里得佻人國長三十丈五尺從此以東十萬里得中秦國人長一丈大秦人民亦壽萬八千歲不知田作但食沙石子山

海經大荒東經注博物志二書鈔百五十九御覽三百七十七又八百十八

按山海經大人國在蹇邱北爲人大坐而削船又東海之外有波谷山有大人之國有大人之市名曰大人之堂有一大人踐其上張其兩耳郭璞注秦時大人見臨洮身長五丈腳跡六尺埤雅東南有人長七丈名曰尺郭一曰黃

父西地有人長二千里名無路西南荒有人長尺名先通
東南荒有人長千里名朴父天竺車隣之國男女皆丈八
尺大秦國人丈五尺

賁居子曰列子所稱龍伯巨人七萬里不盈數步蓋亦
有之而防風之身橫九畝眉見于軾驚陂之木矢鐵鏃
長六尺有半又特其眇小者爾又王莽時奇士巨毋霸
長一丈大十圍本出于蓬萊魏咸熙大人見襄武長二
丈腳跡三尺二寸苻健皇始四年有長人身長五丈是
月霖雨河渭泛溢中流得大屐一隻長七尺三寸屐指
長尺餘而神異經則云西北海外有人焉長二千里兩
腳中間相去千里腹圍一千六百里俱日飲天酒五斗

張華注曰天酒甘露也不食五穀魚肉唯飲酒好遊山海間不犯百姓不干萬物與天地同生名無路之人天地之大故應無所不有耳

少室山其上有白玉膏一服卽仙矣

○山海經西山經注

芝草樹生或如車馬或如龍蛇之狀

○山海經注內南經注

按抱朴子五芝有石芝木芝草芝肉芝菌芝各有名品而肉芝則萬歲蟾蜍千歲蝙蝠靈龜風生獸千歲鸞菌芝狀如宮室或車馬或龍虎或飛鳥或人形五色無常已上服之皆長生

龍魚河圖

河圖篇目已蕪矣類書所錄復有以龍魚命者豈非以

其玉石雜糅椒艾紛汨而衍其牘與要其文字亦雅俚
相乘政不必棄

月有九行赤道二出黃道南黑道二出黃道北白道二出黃
道西青道二出黃道東併黃道爲九行立春春分月從東青
道立秋秋分從西白道立夏夏至從南赤道立冬冬至從北
黑道天有四表月有三道聖人知之可以延年益壽○御覽四

按渾天說日道居中月五星循左右而行故日道獨謂之
黃月行青朱白黑道各兼黃道而言故又謂之九道也是
故月道出入於黃道其最遠者去黃道六度月行黃道之
內曰陰厯行黃道之外曰陽厯北爲內南爲外月行黃道
之南謂之朱道行黃道之北謂之黑道黃道之東謂之青

道黃道之西謂之白道黃道內外各四并黃道爲九日月
之行有遲有速難可以一術御也故因其合散分爲數段
每段以一色名之欲以別算位而已

天歲星主德慶其精下爲天社之神天太白星主兵凶其精
下爲雨師之神天熒惑星主司非其精下爲風伯之神天辰
星主氣司災其精下爲先農之神天鎮星主得土之慶其精
下爲靈星之神〇御覽凡百八十一

按晉志凡五星盈縮失位其精降于地爲人歲星降爲貴
臣熒惑降爲童兒歌謠嬉戲填星降爲老人婦女太白降
爲壯夫處於林麓辰星降爲婦人吉凶之應隨其象告

天之東西南北極各有銅頭鐵額兵長三千萬丈三千億萬

人天之東西南北極各有金剛敢死力士長三千萬丈三千
億萬人天中太平之都有都甲食鬼鐵面兵長三千萬丈三
千億萬人

○御覽三
百七十七

崑崙山天中柱也

○御覽三十
八類聚七

按依順正理論云三十三天迷盧山頂其頂四面各二十
千若據周迴數成八萬有餘師說面各八十千與下際四
邊其量無別山頂四角各有一峯其高廣量各有五百里
有藥叉神名金剛手於中止住守護諸天於山頂中有宮
名善見面二千半周萬踰繕那金城量高一踰繕那半其
地平坦亦真金所成俱用百億雜寶嚴飾地觸柔軟如妒
羅綿於踐躡時隨足高下是天帝釋所都大城城有千門
嚴飾壯麗門有五百青衣藥叉勇健端嚴長一踰繕那量

各嚴鎧杖防守城門於其城中有殊勝殿種種妙寶具足
莊嚴映蔽天宮故名殊勝面二百五十踰繕那周千踰繕
那是謂城中諸可愛事城外四面四苑莊嚴是彼諸天共
遊戲處一衆車苑謂此苑中隨天福力種種畢現二麤惡
苑天欲戰時隨其所須甲杖等現三雜林苑諸天人中所
玩皆同俱生勝喜四喜林苑極妙欲塵雜類俱臻歷觀無
厭如是四苑形皆異方方周千踰繕那量居各有一如意
池池面各五十踰繕那量各功德水彌滿其中隨欲四苑
花鳥香林莊飾業果差別難可思議天福城外西南角有
大善法堂三十三天時集辨論制伏阿素洛等如法事
賁居子曰諸天之淨也元也而四隅八極猶各有威神

以護其居陽之防陰如是其亟也有天下者守在四夷
奈何其不豫

東方太山君神姓圓名常龍南方衡山君神姓丹名靈峙西
方華山君神姓浩名鬱狩北方恆山君神姓登名僧中央嵩
山君神姓軍壽名逸羣呼之令人不病○御覽八
百八十一

東方太山將軍姓唐名臣南方霍山將軍姓朱名丹西嶽華
陰將軍姓鄒名尙北嶽恆山將軍姓莫名惠中嶽嵩高山將
軍姓石名元恆存之卻百邪○同上

東海君姓馮名修青夫人姓朱名隱娥南海君姓視名口赤
夫人姓鬻名逸寥西海君姓勾大名邱白夫人姓靈名素簡
北海君姓禹名帳黑夫人姓結名連翹河伯姓呂名公子夫

人姓馮名夷君有四海河神名竝可請之呼之却鬼氣上同

按雲笈七籤東嶽姓元丘名曰陸南嶽姓爛名洋無西嶽
姓浩嶽名元倉北嶽姓伏名通萌中嶽姓角名晉生句芒
號曰文始洪崖先生東方蒼帝東海君也祝融號曰赤精
成子南方赤帝南海君也蓐收號曰夏里黃公西方白帝
西海君也禺疆號曰冥元子昌北方黑帝北海君也風伯
神名吒號曰長育雨師神名馮修號曰樹德馮夷號曰元
梁使者

養生雜書曰東海姓何名歸君南海姓劉名漱君北海姓
吳名禽強君東海神名阿明南海祝融西海臣乘北海禹
強

廣雅山神謂之離河伯謂之馮夷江神謂之奇相物神謂之鬼土神謂之羶羊水神謂之四鳥木神謂之畢方火神謂之游光金神謂之清明

賁居子曰神豈有姓若字哉借有之孰相呼之且如天劉翁下降而張翁竄竊騎其龍以上則今之天翁已非昔天翁矣千億萬年仙神亦應乘除卽欲執書策之名而呼之恐不應也好異者鉤探亦苦聊以博聞其實名類猥多不勝舉耳

髮神名壽長耳神名嬌女目神名珠映鼻神名勇盧齒神名丹朱夜臥呼之有患呼之九過惡鬼自却○同

按黃庭經曰髮神蒼華字太元腦神精根字泥丸眼神明

上字英元鼻神玉壘字靈堅耳神空聞字幽田舌神通金字正倫齒神綉鋒字羅干一面之神宗泥丸又心神丹元字守靈牙神皓華字虛成肝神龍烟字含明腎神元冥字育嬰脾神嘗在字魂停膽神龍曜字威明皆在心內運天經晝夜存之自長生

酉陽雜俎身神及諸神名異者腦神曰覺元髮神曰元華目神曰虛監鼻神曰冲龍玉舌神曰始梁讀百骸神名可以思養生主矣

劍神名飛揚矛神名天矢陰弓神名曲張斧神名狂章盾神

名自障

類聚六十書鈔百二十三又百二十五御覽三百四十四又三百四十七又三百五十六又七百六十三

三

按埤雅粟曰許給豆曰靈殖黍曰俯佞曲張弓也推亡遠望弩也續長箭也脫光刀也飛揚劍也狂章斧也馮耳孟公船神也黃父漸耳食鬼之神也其貴神之異名又曰五岳神泰曰圓常龍衡曰丹靈峙華曰浩鬱狩恆曰登僧嵩曰軍壽逸羣四海神東曰馮修青南曰視赤西曰句大邱白北曰禹帳黑江神曰奇相河伯曰冰夷淮神曰巫支祁波神曰陽侯游光畢方火神也清明金神也冰腫水神也彭侯雲陽木精也犢羊賈誦土精也

黃帝攝政時有蚩尤兄弟八十一人

○按路史炎帝紀注引作七十二人

並獸

身人語銅頭鐵額食沙石子造立兵仗刀戟大弩威振天下誅殺無道不仁不慈萬民欲令黃帝行天子事黃帝以仁義

不能禁止蚩尤遂不敵黃帝仰天而歎天遣元女下授黃帝

兵信神符制伏蚩尤

○按御覽八百七十二此下有蚩尤歸臣四字

帝因使之主兵

以制八方蚩尤沒後天下復擾亂不寧黃帝遂畫蚩尤形象

以威天下天下咸謂蚩尤不死八方萬邦皆為弭伏

○史記五帝紀

正義類聚十一御覽七十九

賁居子曰昔漢祖持項王頭以下魯城亦師此意然則

軒轅得蚩尤而立其威彼蚩尤者亦得軒轅而顧成其

神耳

流洲在西海中地方三千里上多山川積石名為昆吾石冶

其石為鐵作劍光明四照洞如水精以割玉如泥

○類聚六十書鈔百

二十二御覽三百四十四

元洲在北海中地方三千里去南岸十萬里上有芝草生元

澗澗水如蜜味服之長生

○御覽五十九

歲暮夕四更中取二七豆子二七麻子家人頭髮少許合麻

豆著井中呪勅井使其家竟年不遭傷寒辟五方疫鬼

○齊民要

術二御覽八
百四十一

懸艾虎鼻門上宜官子孫帶印綬懸艾虎鼻門中周一年取

燒作屑與婦飲之二月中便有娠生貴子勿令人知之泄則

不驗也亦勿令婦見之

○御覽八
百九十一

七月七日取赤小豆男吞一七女吞二七令人畢歲無病

又

七月七日曬曝革裘無蟲

又七月七日取烏雞血和三月三

日桃花末塗面及遍身三二日肌白如玉

冬以臘月鼠斷尾正月旦日未出時家長斬鼠著屋中祝云

付勅屋吏制斷鼠蟲三時言功鼠不敢行齊民要術五

埋蠶沙於宅亥地大富得蠶絲吉利以一斛二斗甲子日鎮

宅大吉致財千萬齊民要術五御覽八百二十五

婦人無以夫衣合集浣之使之不利御覽八百二十六無以賣馬

錢娶婦以賣馬錢娶婦令多惡病夫妻離別御覽五百四十一又八百九

三十

白馬元頭食之殺人下病食馬肉亦殺人御覽八百九十三羊有

一角食之殺人齊民要術六類聚九百二十四御覽九百二元雞白頭食之殺人

雞有四距亦殺人六指亦殺人雞有五色亦殺人初學記三十齊民

要術六御覽九百十八犬狗魚鳥不熟食之成瘕痛御覽七百四十三無痛字

瓜有兩鼻者殺人

○齊民要術二初學記二十八類聚八十七御覽九百七十八

按大清外衛生人髮挂果樹烏鳥不敢食其實 瓜兩鼻

兩蒂食之殺人 簷下滴菜有毒堇黃花及赤芥殺人

瓠牛踐苗則子苦 大醉不可臥黍穰上汗出眉髮落

婦人有娠食乾薑令胎內消 十月食霜菜令人面無光

三月不可食陳菹 沙衣結治蠹蝮瘡 井口邊草主

小兒夜啼著母臥薦下勿令知之 船底苔療天行 寡

婦藁薦草節去小兒霍亂 自縊死繩主願狂 孝子衿

灰傅面耐 東家門雞棲木作灰治失音 砧垢能蝕人

履底 古櫬反作琴底合陰陽通神 魚有睫及目合腹

中目連珠二目不同連鱗白鬣腹下丹字並殺人 鼈目

白腹下有五字字不可食 蟹腹下有毛殺人 蛇以桑
柴燒之則見足出 獸岐尾鹿斑如豹羊心有竅害人
馬夜眼五月以後食之殺人 犬懸蹄肉有毒 白馬
鞍下肉傷人五臟 烏自死目不閉鴨目白烏四距卵有
八字並殺人 凡飛鳥投人家井中必有物當拔而放之
水脈不可斷井中沸不可飲酒漿無影者不可飲 蝮
與青蛙蛇中最毒蛇怒時毒在頭尾 凡冢井間氣秋夏
中之殺人先以雞毛投之毛直下無毒迴旋而下不可犯
當以醋數斗澆之方可入矣 頗黎千歲冰所化也 琉
璃瑪瑙先以自然灰煮之令軟可以雕刻自然灰生南海
瑪瑙鬼血所化也

高皇攝政總萬庭四海歸詠治威明文德道化承天精元祚
興隆協聖靈

○御覽
八十七

古微書卷三十四

古微書卷三十五

洛書緯

漢儒傳洪範以初一五行六十五字徑爲洛書本文既有本文又何云戴履肩足白文二十五黑文二十也雖然緯書若出漢世者便應演洪範之文而語不及範固知出春秋季世矣今讀其文大類讖詞豈河圖主緯洛書主讖耶

洛書靈准聽

所述多太古溟滓以上故言其幽靈忽恍不可爲象而但溢于聽謂聽之以氣也非聲也

洛水者地理陰精之官帝王明聖龜書出文天以與命地以

授瑞按河合際居中護羣王道和洽吐圖佐神逆名亂教摘

亡弔存故聖人觀河洛也○初學記六以爲河圖文

按乾坤鑿度孔子曰帝德之應洛水先温九日後五日變

爲五色元黃天地之靜書見矣負圖出午聖人見五日以

五日見十日以十日見十五日以十五日見二十日以二

十日見二十五日以二十五日見三十日以三十日又曰

帝王始起河洛龍馬皆察其首蛇亦然其首黑者人正其

首白者地正其首赤者天正謹其友生之甲乙丙丁戊己

庚辛壬癸各居應其國中以動靜逆順此天地神靈佐助

之期吉凶之應注各居其國者若甲爲齊乙爲東夷王者起於此國中龍則用其卦日蛇則用其卦

月動謂河洛水靜謂陵陸地各如其迹也

氣五機七八合提九爻結八九七十二錄圖起

鄭元注曰氣五寓之五行

機七十二里也二十八宿以存焉二者用事以卦相提得一歲俱終而太一行九宮及位遊相結每宮如卦之日則參差矣八九相乘七十二歲而七百二十歲復於冬至甲子生象其數以為軌焉故曰錄圖起之○易乾鑿度

按乾坤鑿度欲求水旱之厄以位入軌年數除軌算盡則

厄所遭也甲乙為饑丙丁為旱戊己為中興庚辛為兵壬

癸為水臥算為年立算為日必除先入軌年數水旱兵饑

得矣如是乃救災度厄扶陽之法

天皇頎羸三舌驤首鱗身碧盧禿揭地皇十一君皆女面龍

頰馬躡虵身人皇龍身九頭驤首達腋○語見路史前紀地皇氏逸

于有人皇九男相像其身九章○路史秦皇紀注引洛書相厥山川形

成勢集才為九州謂之九圍人皇始出於提地之國九男

兄弟相像以別長九州已居中州以制八輔 人皇氏駕六

提羽乘雲祗車同並 人皇別長九州離良地精生女為后

夫婦之道始此御覽百三十五路史前紀注並以為洛書攝亡辟文

厲山氏產山谷分布元氣即烈山氏此路史炎帝紀注引開山圖文

按洞神經天皇氏以獲為名以望為姓字子潤地皇姓鑑

名嶽字子元人皇姓愷名胡洮字文生

項竣始學篇天地立有天皇十三頭號曰天靈治萬八千

歲以木德王地皇十二頭治萬八千歲人皇九頭兄弟各

三千三百歲依山川土地之勢裁度為九州各居一方因

是而區別

皇道缺故帝者興初學記九御覽七十六引洛書

赤帝之為人視之豐長八尺七寸豐下兌上龍顏日角八采

三眸鳥庭荷勝琦表射出握嘉履翼毅息洞通○語見路史陶唐紀

舜長九尺太上員首龍顏日衡方庭甚口面頤亡髦懷珠握

襲形卷婁色驚露目童重曜故曰舜而原曰重華○語見路史有虞紀

禹身長九尺有只虎鼻河目齟齒鳥喙耳三漏戴成鈴裏玉

斗玉斲履已○語見路史夏后紀

有人方面日衡重華衡有骨表如日也眉上曰衡重華重童子握石椎懷神珠讀

如錘言能平輕重也握謂知玉衡之道懷神珠喻有明性也璿璣玉衡以齊七政厯象日

月星辰正月上日舜受終鳳凰儀黃龍感朱草生萁莢孳西

王母授益地圖○類聚十一御覽八十一路史有虞紀注

有人也謂禹也大口兩耳參漏足文履已漏空也戊己土之日當平水土故以為名也

首戴鉤鈐

有骨表如鉤鈐

胸懷玉斗

懷璇璣玉衡之道或以爲有黑子如玉斗也○御覽八十二

有人出石夷握地代戴成鈐懷玉斗

○初學記九路史夏后紀注

按拾遺記禹鑿龍關之山亦謂之龍門至一空巖深數十里幽暗不可復行禹乃負火而進有獸狀如豕銜夜明珠其光如燭又有青犬行吠於前禹計可十里迷於晝夜既覺漸明見向來豕犬變爲人形皆著元衣又見一神蛇身人面禹因與語神卽示禹八卦之圖列於金板之上又有八神侍側禹曰華胥生聖子是汝耶答曰華胥是九河神女以生余也乃探玉簡授禹長一尺二寸以合十二時之數使量度天地禹卽持執此簡以平定水土蛇身之神卽羲皇也

賁居子曰自混沌盤古氏為一開闢伏羲氏為再開闢

至大禹為開闢之三矣故雒書汲汲推大禹云

又按乾坤鑿度孔子曰復表曰角

表者人形體之章誠也名復者初震爻也震之

體在卯日於出焉又初應在六四於辰在丑為牛牛有角復人表象

臨表龍顏

名臨者二爻而互體震震

為龍應在六五六五離爻也體南方為上故臨人表在顏也

泰表載干

干楯也名泰者三爻也而體艮

艮為山山為石體有以行懼難之器云應在上六于人體俱須泰人表載于干上也

大壯表握訴龍

角大辰

辰辰名辰者五立於之唇四名卦而震為龍故大壯人之表其象者也

者又五於人體當艮卦於夫亦手體成其四則震爻也為足其三猶辰爻於十次值本於坼七曜之行起焉七者

夫表升骨履文

辰在斗魁所指

屬文北斗在骨足履

姤表耳參漏足履王知多權

姤初爻

文夫人之表象明也

為風風有聲而無形也九竅之分目視形耳聽聲人聲屬坎坎為水水為孔穴象消卦其道五事曰聽耳而三漏聽

為風風有聲而無形也九竅之分目視形耳聽聲人聲屬坎坎為水水為孔穴象消卦其道五事曰聽耳而三漏聽

之至巽為股初爻最在下足象消卦其姤離為明人君南
面而治焉足行於其上姤人表覆王是繇然王人君最尊
者離又為火火者土寄位焉土數五當如姤氣于其上故
入兼更得性耳巽為進退又為近利有知即以進退求利
此謂之姤焉者陰氣之
始故因其表見其情

遯表曰角連理

名遯者以離爻也
離為日消卦遯主

六月於辰未未為羊有角離南方之卦也五均南方為衡
人之眉上曰衡衡者平地連理或謂連珠者其骨起衡之
遯人表亦少少然詩含神霧

否表二好文

否卦或為之時名
否卦者三也三

云四角主張熒惑司過也
在互體艮之中艮為木多節否人之表二時象
之與三艮卦體互坤坤為文故性亦好文也

觀表出準

虎名觀者亦在五艮之中而位上艮為山澤山通氣其於
人體則鼻也艮又門闕觀謂之闕準在鼻上而高顯觀

人表出之象艮為禽喙之屬而
當兌之上兌為口虎唇又象焉

剝表重瞳明歷元

名剝者
五色也

五離爻離為日瞳日子六五于辰又在卯酉屬也剝離
人表重焉五月卦體在艮終萬物始萬物莫盛乎艮歷數
以有終始剝人兼之性自然表象
參差神實為之難得縷耳所聞差

此皆律歷運期相一匡

之神也欲所按合誠主正月不三者此人心
之合誠春秋識卷名也

賁居子曰自古論形相未有參以卦象者此道精眇矣
故述其大端若斯

黑帝子湯長八尺一寸或曰七尺連珠庭臂二肘○初學記九御覽八

三十

湯臂有四肘在亳能修其德東至於洛觀帝堯之壇沈璧退

立黃魚雙踴黑鳥隨魚止于壇化為黑玉又有黑龜並赤文

成字言夏桀無道湯當伐之○語見宋書符瑞志

檮杌之神見于邳山有神牽白狼銜鉤而入商朝金德將盛

銀自山溢湯將奉天命以放桀夢及天而錫之遂有天下○同

上

按周書殷祝解湯將放桀於中野士民間湯在野皆委貨

扶老攜幼奔國中虛桀請湯曰國所以爲國者以有家家
所以爲家者以有人也今國無家無人矣君有人請致國
君之有也湯曰否昔大帝作道明教士民今君王滅道殘
政士民惑矣吾爲王明之士民復致於桀曰以薄之居濟
民之賤何必君更桀與其屬五百人南徙千里止於不齊
民往奔湯於中野桀復請湯言君之有也湯曰否我爲君
王明之士民復重請之桀與其屬五百人徙於魯魯士民
復奔湯桀又曰國君之有也吾則外人有言彼以吾道是
耶我將爲之湯曰此君王之士也君王之民也委之何湯
不能止桀湯曰欲從者從君桀與其屬五百人去湯放桀
而復薄三千諸侯大會湯退再拜從諸侯之位湯曰此天

子位有道者可以處之天子非一家之有也有道者之有也故天下者唯有道者理之唯有道者紀之唯有道者宜久處之湯以此讓三千諸侯莫敢卽位然後湯卽天子之位與諸侯誓曰陰勝陽卽謂之變而天弗施雌勝雄卽謂之亂而人弗行故諸侯之治政在諸侯之大夫治與從湯之事罕有聞者以其匿汲冢書中輒爲標出

有人雄起戴玉英祈旦失籥亡其金虎東南紛紛注精起昌

光出軫已圖之○此條已見尙書帝命驗篇

有鳳凰銜書游文王之都書文曰殷帝無道虐亂天下皇命已移不得復久靈祇遠離百神吹去五星聚房昭理四海○語

見宋書符瑞志

按國語惠王十五年有神降於莘內史過曰昔夏之興也融降於崇山其亡也回祿信於聆隧商之興也檇杙次於邳山其亡也夷羊在牧周之興也鸞鷲鳴於岐山其衰也杜伯射王於郟王曰今是何神也對曰昔昭王娶於房曰房后實有爽德協於丹朱丹朱馮身以儀之生穆王焉實照臨周之子孫而禍福之若繇是觀之其丹朱乎

賁居子曰明神之降若此其赫也而又有匿形聞聲盡日交人者如吳太主時羅陽縣有神自稱王表周旋民間語言飲食與人無異然不見其形又有一婢名紡吳主遣李崇齋印綬迎表表隨崇俱出及所在郡守令長談論所歷山川輒遣婢與其神相聞崇與表至權於蒼

龍門外爲立第舍數使近臣齋酒食往表說水旱小事
往往有驗 噫史冊所記之神怪莫著于是矣丹朱之
爲穆王遂增出後世輪迴功案其說紛多

蒼帝姬昌日角鳥鼻身長八尺二寸聖智慈理

○史記周本紀正義御覽

八十以成草木之長而順天時水澤不內舟以成魚鼈之長

不麇不卵以成鳥獸之長畋獵唯時不殺童羊不夭胎童牛

不服童馬不馳不驚澤不行害土不失其宜萬物不失其性

天下不失其時

○自以成草木之長以下並御覽八十四引周書語檢逸周書文傳解與此大同非緯文

也孫氏并取之誤

文王獨坐屏去左右深念遠慮召太公望曰商王猛暴無文
強梁好武侵凌諸侯苦勞天下百姓之怨心生矣其災予奚

行而得免於無道乎太公曰因其所為但興其化上知天道

中知人事下知地理乃可以有國焉○此御覽八十四引周書語非緯文

武王伐紂渡孟津中流白魚躍入王舟王俯取魚長三尺目

下有赤文成字言紂可伐王寫以世字魚文消燔魚以告天

有火自天止于王屋流為赤烏烏銜穀焉穀者紀后稷之德

火者燔魚以告天天火流下應以吉也遂東伐紂勝於牧野

兵不血刃而天下歸之○語見宋書符瑞志

按仁王經世間帝王有其五種一粟散王威德最劣二鐵

輪王治閻浮提三銅輪王兼二天下四銀輪王化三天下

五金輪王統四天下

廣宏明集云此之五王論其位上下不同語其德勝劣有

異推秦皇漢武閻浮提內唯王震旦五種王中粟散王也

蒼帝起天雨粟

○類聚八十
五引洛書

有白雲出自蒼梧入于大梁

○類聚九十
八引洛書

有氣象人青衣無手在日西天子之氣象也

○史記天官書
索隱御覽十五

引洛書

蒼帝起青雲扶日赤帝起赤雲扶日黃帝起黃雲扶日白帝

起白雲扶日

○初學記一御
覽八引洛書

按晉志天子氣內赤外黃四方所發之處當有主者若天子欲有遊往處其地亦先發此氣或如城門隱隱在氣霧中恆帶殺氣森森然或如華蓋在氣霧中或氣象青衣人無手在日西或如龍馬或雜色鬱鬱衝天者此皆帝王氣

太白守心後九年大饑熒惑守心逆臣起

○續漢書天文志注引洛書

按天官書太白白比狼赤比心黃比參左肩蒼比參右肩黑比奎大星亢為疏廟太白廟也太白大臣也其號上公熒惑從太白軍憂離之軍却其入守犯太微軒轅營室主命惡之心為明堂熒惑廟也謹候此

王者不藏金玉則紫玉見於深山服飾不踰祭服則玉英出

○初學記二十七御覽八百五引洛書

靈龜者元文五色神靈之精也上隆法天下平象地能見存亡明於凶吉王者不偏黨尊者則出

○初學記三十御覽九百三十一引洛書

按爾雅一曰神龜二曰靈龜三曰攝龜四曰寶龜五曰文龜六曰筮龜七曰山龜八曰澤龜九曰水龜十曰火龜周

禮鄭元注六龜之屬天龜元地龜黃東龜青西龜白南龜赤北龜黑龜俯者靈仰者繹前弇果後弇獵左倪靄右倪若是其體也東龜南龜長前後在陽象經也西龜北龜長左右在陰象緯也天龜俯地龜仰東龜前南龜卻西龜左北龜右各從其耦

比讀褚先生傳龜名又異一曰北斗龜二曰南辰龜三曰五星龜四曰八風龜五曰二十八宿龜六曰日月龜七曰九州龜八曰玉龜凡八名龜龜圖各有文在腹下文云云者此某之龜也記曰能得名龜者財物歸之家必大富至千萬宋元王之得龜也孔子聞之曰神龜知吉凶而骨直空枯曰爲德而君於天下辱於三足之烏月爲刑而相佐

見食於蝦蟇蝟辱於鵠騰蛇之神而殆於卽且竹外有節
理中直空虛松柏爲百木長而守門閭日辰不全故有孤
虛黃金有疵白玉有瑕事有所疾亦有所徐物有所拘亦
有所據罔有所數亦有所疎人有所貴亦有所不如何可
而適乎物安可全乎天尙不全故世爲屋不成三瓦而陳
之以應之天天下有階物不全乃生也又卜禁日子亥戌
不可以卜及殺龜日中如食已卜暮昏龜之微也不可以
卜庚辛可以殺及以鑽之常以月旦祓龜先以清水澡之
以卵祓之乃持龜而遂之若嘗以爲祖人若己卜不中皆
祓之以卵東向立灼以荆若剛木土卵指之者三持龜以
卵周環之祝曰今日吉謹以梁卵煇黃祓去玉靈之不祥

玉靈必信以誠知萬事之情辨兆皆可占不信不誠則燒
玉靈揚其灰以徵後龜其卜必北向龜甲必尺二寸

賁居子曰自夫子贊易著重而龜不傳矣褚生補此猶
上古墨灼之遺法歟卽以爲卜經亦可

鰓鰒魚狀如鵲食之不癩出涿光之山

○御覽九百三十
九引洛書癩作瘰

按山海經諸鳥食之有益人者黃鳥不妬鵒宜子盤鵒已

喝鵒無臥肥遺已癩櫟已痔數斯已癭鷖已腹痛又已

疴鵒不饑馱已墊橐萑不畏雷鵒鷄不魘當康不眴目眩

也白鵒已噬痛又已痢鳩渠已曝皮皺起也佩之鵒鷄馱餘俱

辟火寓辟兵青耕辟疫 諸獸食之有益者狴狴善走類

不妬九尾狐不蠱天狗已癩耳鼠不睬腹脹也蠶蚩不眯隣

不風佩之搏訖不畏謹孟槐天狗俱禦凶臙疏辟火臧羊
脂傅之已腊體諸魚食之有益者鯨無腫鯨無蠱又不
癡修辟已白癩條已憂鮪已狂鯨不驕鮒已嘔箴不疫蟹
不癘芷不糟佩之鱮鱮禦火

陪臣執命王公望風謀始合羣下並附諸侯歸心則月舉足

垂爪

○占經十一
一引洛書

古微書卷三十五

古微書卷三十六

洛書甄曜度

緯書以曜稱者凡四見曰靈曜曰文耀曰耀鉤曰耀嘉
未有博極軌度者惟洛書所構旁蠡周天罔不具悉蓋
星歷之學聖門所首務焉後世不第棄置之而且曰知
星宿衣不覆率用爲戒矣嗟乎士子出其戶舉目則見
天而顧不解列宿爲何物也亦足羞矣夫天事恆象象
則顯矣昭昭矣何難知哉人自不學耳

周天三百六十五度四分度之一天一度爲二千九百三十
二里則天地相去十七萬八千五百里○御覽二周天一百七萬
一千里一度爲二千九百三十二里七十一步二尺七寸四

分四百八十七分分之三百六十二○晉書天文志

推廣九道百七十一歲進退六十三分百四十四歲一超次

與天相應○續漢書律歷志云孝武皇帝更建太初其後劉

度推度九道百七十一歲進退六十三分百四十四歲一超次與天相應少有闕謬此言九道進退之術本於河洛非謂此二十七字即緯書本文也且志以帝覽嬖與甄曜度並言而孫氏專屬之甄曜度尤為失考

按晉志周天三百六十五度五百八十九分度之百四十

五半覆地上半在地下其二端謂之南極北極北極出地

三十六度南極入地三十六度兩極相去一百八十二度

半疆繞北極徑七十二度常見不隱謂之上規繞南極七

十二度常隱不見謂之下規赤道帶天之絃去兩極各九

十一度少強黃道日之所行也半在赤道外半在赤道內

與赤道東交於角五少弱西交於奎十四少強其赤道外極遠者去赤道二十四度斗二十一度是也其入赤道內極遠者亦二十四度井二十五度是也日南至在斗二十一度去極百一十五度少強是也陸續云天東西南北徑三十五萬七千里此言周三徑一也考之徑一不啻周三率周百四十二而徑四十五則天徑三十二萬九千四百一里一百二十二步二尺二寸一分七十一分分之十以句股法言之旁萬五千里句也立八萬里股也從日邪射陽城弦也以句股求弦法入之得八萬一千三百九十四里三十步五尺三寸六分天徑之半而地上去天之數也倍之得十六萬二千七百八十八里六十一步四尺七

寸二分天徑之數也以周率乘之徑率約之得五十一萬三千六百八十七里六十八步一尺八寸二分周天之數也

又按周髀算經周天七衡周而六閒是故一衡之閒萬九千八百三十三里三分里之一卽爲百步內一衡徑二十三萬八千里周七十一萬四千里分爲三百六十五度四分度之一度得一千九百五十四里二百四十七步千四百六十一分步之九百三十三次二衡徑二十七萬七千六百六十六里二百步周八十三萬三千里分里爲度度得二千二百八十里百八十八步千四百六十一分步之千三百三十二次三衡徑三十一萬七千三百三十三里

一百步周九十五萬二千里分爲度度得二千六百六里
百三十步千四百六十一分步之二百七十次四衡徑三
十五萬七千里周一百七萬一千里分爲度度得二千九
百三十二里七十一步千四百一十分步之六百六十九
次五衡徑三十九萬六千六百六十六里二百步周一百
一十九萬里分爲度度得三千二百五十八里十二步千
四百六十一分步之千六十八次六衡徑四十三萬六千
三百三十三里一百步周一百三十萬九千里分爲度度
得三千五百八十三里二百五十四步千四百六十一分
步之六次七衡徑四十七萬六千里周一百四十二萬八
千里分爲度度得三千九百九里一百九十五步千四百

六十一分步之四百五周二百四十三萬里分爲三百六十五度四分度之一度得六千六百五十二里二百九十三步千四百六十一分步之三百二十七過此而往者未之或知又曰陰陽之數日月之法十九歲爲一章四章爲一部七十六歲二十部爲一遂遂千五百二十歲三遂爲一首首四千五百六十歲七首爲一極極三萬一千九百二十歲生數皆終萬物復始天以更元作紀歷

甄鸞注引乾鑿度曰甲子爲部首七十六歲次得癸卯部七十六歲次壬午部七十六歲次辛酉部七十六歲凡三百四歲木德也主春生次庚子部七十六歲次己卯部七十六歲次戊午部七十六歲次丁酉部七十六歲凡三百

四歲金德也主秋成次丙子部七十六歲次乙卯部七十
六歲次甲午部七十六歲次癸酉部七十六歲凡三百四
歲火德也主夏長次壬子部七十六歲次辛卯部七十六
歲次庚午部七十六歲次己酉部七十六歲凡三百四歲
水德也主冬藏次戊子部七十六歲次丁卯部七十六歲
次丙午部七十六歲次乙酉部七十六歲凡三百四歲土
德也主致養其德四正子午卯酉而期四時焉凡一千五
百二十歲終一紀復甲子故謂之遂也

賁居子曰星紀分野之度自兩漢歷志古星經外則蔡
邕月令皇甫世紀其分秒已縷縷矣未有及雲漢者偶
讀唐志得僧一行兩戒之辨起乎雲漢而始知周天之

度又古法所未盡者謹誌爲殿

按僧一行曰天下山河之象存乎兩戒北戒自三危積石負終南地絡之陰東及太華逾河並雷首底柱黃屋太行北抵常山之右乃東循塞垣至濊貊朝鮮是謂北紀所以限戎狄也南戒自岷山嶓冢負地絡之陽東及太華連商山熊耳外方桐柏自上洛南逾江漢攜武當荆山至于衡陽乃東循嶺徼達東甌閩中是謂南紀所以限蠻夷也故星傳謂北戒爲胡門南戒爲越門河源自北紀之首循雍州北徼達華陰而與地絡相會並行而東至太行之曲分而東流與涇渭濟瀆相爲表裏謂之北河江源自南紀之首循梁州南徼達華陽而與地絡相會並行而東及荆山

之陽分而東流與漢水淮瀆相爲表裏謂之南河故於天象則宏農分陝爲兩河之會五服諸侯在焉自陝而西爲秦涼北紀山河之曲爲晉代南紀山河之曲爲巴蜀皆負險用武之國也自陝而東三川中岳爲成周西距外方大伾北至于濟南至于淮東達鉅野爲宋鄭陳蔡河內及濟水之陽爲鄴衛漢東濱淮水之陰爲申隨皆四戰用文之國也北紀之東至北河之北爲邢趙南紀之東至南河之南爲荆楚自北河下流南距岱山爲三齊夾右碣石爲北燕自南河下流北距岱山爲鄒魯南涉江淮爲吳越皆負海之國貨殖之所阜也自河源循塞垣北東及海爲戎狄自江源循嶺徼南東及海爲蠻越觀兩河之象與雲漢之

所始終而分野可知矣於易五月一陰生而雲漢潛萌於
天稷之下進及井鉞間得坤維之氣陰始達于地上而雲
漢上升始交於列宿七緯之氣通矣東井據百川上流故
鶉首爲秦蜀墟得兩戒山河之首雲漢達坤維右而漸升
始居列宿上觜觶參伐皆直天關表而在河陰故實沈下
流得大梁距河稍遠涉陰亦深故其分野自漳濱卻負恆
山居北紀衆山之東南外接髦頭地皆河外陰國也十月
陰氣進踰乾維始上達于天雲漢經營室東壁間升氣悉
究與內規相接故自南正達于西正得雲漢升氣爲山河
上流自北正達于東正得雲漢降氣爲山河下流陬訾在
雲漢升降中居水行正位故其分野當中州河濟間且王

良閣道由紫垣絕漢抵營室上帝離宮也內接成周河內
皆豕韋分十一月一陽生而雲漢漸降退及良維始下接
于地至斗建間復與列舍氣通於易天地始交泰象也踰
析木津陰氣益降進及大辰升陽之氣究而雲漢沈潛于
東正之中故易雷出地曰豫龍出潛爲解皆房心象也星
紀得雲漢下流百川歸焉析木爲雲漢末派山河極焉故
其分野自南河下流窮南紀之曲東南負海爲星紀自北
河末派窮北紀之曲東北負海爲析木負海者以其雲漢
之陰也唯陬訾內接紫宮在王畿河濟間降婁元枵與山
河首尾相遠隣顛頊之墟故爲中州負海之國也其地當
南河之北北河之南界以岱宗至於東海自鶉首踰河戒

東曰鶉火得重離正位軒轅之祇在焉其分野自河華之交東接祝融之墟北負河南及漢蓋寒燠之所均也自析木紀天漢而南曰大火得明堂升氣天市之都在焉其分野自鉅野岱宗西至陳留北負河濟南及淮皆和氣之所布也陽氣自明堂漸升達於龍角曰壽星龍角謂之天關於易氣以陽決陰夫象也升陽進踰天關得純乾之位故鶉尾直建巳之月內列太微爲天廷其分野自南河以負海亦純陽地壽星在天關內故其分野在商亳西南淮水之陰北連太室之東自陽城際之亦異維地也

洛書摘六辟

此蓋祧諸帝矣而耑於茫眇之代間取其道德尤元者

斬于六君云

孔子曰洛書摘六辟曰建紀者歲也成姬昌有命在河聖孔

表雄德庶人受命握麟徵易歷曰陽紀天心建紀者謂大易

數此道成於文王聖也孔表雄著漢當興以庶人之有仁德

受命為天子此謂使以獲麟為應易猶象也孔子以歷說易

名曰象也今易象四篇是紀古說假借字耳別序聖人題錄興亡州土名號姓輔

爻符言孔子將此應之亡殷者紂黑期火戊倉精受命女正

昌効紀承餘以著當火戊午部也午為火必言火戊者木

火使其子為己塞水是助倉精絕殷之象字或作之滅動効

承餘以著所當文王所出云今入元者是也○易乾鑿度

次是民沒六皇出天地命易以第絕宋均曰次民沒民始穴

人數者也○路史前紀辰放大頭四乳號曰皇次屈出地勃

引此文第絕作地紀飛麟從日月飛麟獸有翼能飛者洽二

百五十歲〇初學記二十九

洛書錄運法〇按諸書所引並作河圖錄運法

此其書亦必有關運位蓋隱識存焉而世不聞耳

黃帝坐元扈閣上與大司馬容光左右輔將周昌二十二

臨觀鳳圖〇御覽二百九路史黃帝紀注一作臨觀鳳凰之至〇書鈔五十二無之至二

字

舜以太尉受號為天子五年二月東巡狩至於中州與三公

諸侯臨觀黃龍五采負圖出置舜前也〇書鈔五十五

孔子曰昔逢氏抱小女末嬉觀帝為履癸妃一本逢氏抱小

女妹嬉帝孔甲說之以為太子履癸妃〇御覽百三十五

有人卯金握天鏡〇文選廣絕交論注卯金下有刀字

按竹書紀年癸命扁伐山民山民女子桀二人曰琬曰琰
后愛二人女無子焉斲其名于荇華之玉荇是琬華是琰
而棄其元妃于洛曰妹喜於傾宮飾瑤臺居之

述異志夏桀宮中有女子化爲龍不可近俄而復爲婦人
甚麗而食人桀命爲蛟妾告桀吉凶惟楚莊王時宮人一
旦而化爲野蛾飛去此爲最奇

河洛讖

孔子河洛讖

二口建戈不能方兩金相刻發神鋒空穴無主奇入中女子

獨立又爲雙

○宋書符瑞志

注二口建戈劉字也晉金行劉姓又金故曰兩金空穴奇

入為奇字女加又奴字

錄運期識

九侯七傑爭民命炊骸道路籍籍履人頭○原刻脫此誰使

主者元且來謂劉元德也○三國志注三十二

甄曜度識

赤三德昌九世會備合帝際指劉備也○三國志注三十二

沙流不言小人起擅百川亂不言小人執政○抄本書鈔百五十九

古微書卷三十六終

古微書跋

儒者類稱緯候起於哀平之際然列子有形生於無形云云凡百六十餘字與乾鑿度同文呂氏春秋觀表篇亦有緣圖蠲薄之語則緯書之來蓋久其後展轉附益真贋錯雜隋人惡其誕妄遂欲一掃而空之由是寢傳寢微幾於滅絕孫氏此書存什一於千百可謂信而好古矣近侯官趙氏因此書之舊復輯七緯所得較孫氏爲多然初始者難爲功繼起者易爲力且趙書有緯無識有七經緯無河洛緯尤不若孫氏之詳備趙本雖每條注明出某書某卷而舍前舉後移甲就乙者不可更僕數且有古微書不誤而趙本反誤者有古微書有而趙本反無者又孫所據北堂書鈔尙係原本而趙氏

則據陳禹謨刪節之本修文殿御覽等書明時尙未佚去而趙氏已不得見故二書互有短長不得執彼以廢此也緯書文辭古奧兼古微書傳寫脫誤益詰屈不可通今重爲博考附注本條之下其所不知蓋闕如也蒐輯間頗有出孫趙二本外者他日得整齊排比別爲一書或亦稽古者一助云爾道光辛丑小暑前一日金山錢熙祚錫之甫識